

गिरचो संतके चरणन जाई । कह्यो नाव कैसे चलि जाई ॥
 नौका चढ़ौ संत भगवंता । मैं करिदेहौ पार तुरंता ॥
 चढ़े संत पुनि नावहि माहीं । तब गँभीर जल भये तहाँहीं ॥

दोहा—पार गये जब संत सब, छायो जयजयकार ॥

तहँको नृप अचरज सुन्यो, आयो तहँ बिन वार ॥३॥

संतन को लैजाय धर, कीन्ह्यो अति सतकार ॥

साधुनके परभाव ते, गवन्यो राम अगार ॥ ४ ॥

इति श्रीरामरसिकावल्यांकलियुगखंडेसप्तविंशोऽध्यायः ॥ २७ ॥

अथ नामदेवकी कथा ॥

छप्पय—अब वर्णौ मैं नामदेव इतिहास मनोहर ॥

जासु प्रतिज्ञा सत्य कियो जगमें विश्वंभर ॥

जैसे श्रीप्रह्लाद प्रतिज्ञा सतयुग राख्यो ॥

नामदेवके हाथ नाथ गौरस पुनि चाख्यो ॥

पुनि बादशाह ढिग जायकै मृतक गाइको ज्याय दिय

यमुनादहतेबहुरतनमयबहुपर्यंकनिकसिलिय ॥ १ ॥

हरिमंदिर को पूर्व द्वार पश्चिम करि दीन्ह्यो ॥

जासु भवन पंढरीनाथ निज हाथन कीन्ह्यो ॥

हरिव्रत एकादशी परीक्षा सबन देखाई ॥

कियो चतुर्भुज येक प्रेत यज्ञ भयो महाई ॥

इक साहु दानमानी रख्यो तासु महामद हरि लियो ॥

इतिहास सकल विश्वास हित मैं अब वर्णन करि दियो

दोहा—पंढरपुर दरजी रख्यो, वामदेव जेहि नाम ।

बड़ो भक्त भगवानको, तासु सुता इक आम ॥ १ ॥

मरचो तासु पति कौनेहु काला । वामदेव कह वचन विशाला ॥

बेटी भक्ति करै हरि केरी । उभय लोक सुधरै विन देरी ॥
 करन लगी हरि भजन कुमारी । एक दिन तासु परोसिन नारी ॥
 गोद लिये निज सुत कहँ आई । वामदेव कन्या तब धाई ॥
 सो सुत को लीन्हो निज गोदू । सुत वासना भई भरि मोदू ॥
 हे हरि होत जो पुत्र हमारे । तौ खेलाय लहत्युं सुख भारे ॥
 तासु मनोरथ पूरण हेतू । भयो गर्भ महँ कृपानिकेतू ॥
 विधवा गर्भ बढ़यो अपवादा । पितु पूछ्यो तेहि पाय विषादा ॥
 सुता शपथ करि कह जस भयऊ । राति मुकुंद स्वप्न तेहिं दयऊ ॥
 वामदेव तुव सुता अदोषा । मोहिं जानहु गर्भहि तजि रोषा ॥
 तू जनि करु अपयश की संका । पुत्र भये नहिं होय कलंका ॥
 वामदेव तब शंक विहाई । सेवन लग्यो सुतैं सुख छाई ॥

दोहा—कछुक काल महँ सुत भयो, वामदेव सुत पाय ।

नामदेव तेहि नाम दिय, बहु धन दीन लुटाय ॥१॥
 पांच वर्ष जब बालक भयऊ । तबहीं ते हरिपद चित दयऊ ॥
 खपरा पाथर घर महँ ल्याई । तिनको यदुपति मूर्ति बनाई ॥
 पूजै तिनको आँशु बहाई । घंट बजावै भोग लगाई ॥
 पुनि माता महँ वामदेव सों । कह्यो वचन अस नामदेवसों ॥
 जो पूजा करियत तुम नाना । सो मोहिं देहु उछाह महाना ॥
 नामदेव कह अबै न तोसों । बनिहै पूजन बनै जो मोसों ॥
 दूध औटि तेहि सिता मिलाऊँ । मैं नारायण भोग लगाऊँ ॥
 नामदेव कह अधिक बनैगी । करु विश्वास नहिं कछु ॥
 वामदेव तब हँसि अस गायो । एक पूजन मैं देत बतायो ॥
 मैं हरिको नित दूध खवाऊँ । मैंहूँ तासु प्रसादी पाऊँ ॥
 मैं तौ जात अहाँ इक ग्रामा । तू खवाइयो प्रथमहि यामा ॥
 अस कहि वामदेव गो ग्रामै । नामदेव कीन्हो अस कामै ॥

दोहा—दूध ओटि मिसरी मिलै, हरि आगे धरि दीन ।

घंट बजाय लगाय पट, आप बैठ सुख भीन ॥ २ ॥

कछुक काल महँ पुनि पट खोला । वैसहि दूध लख्यो तब बोला
दूध रतीभर कियो न पाना । देहै मोहिं दोष अब नाना ॥
अस कहि पुनि २ घंट बजावै । पियो २ पुनि २ अस गावै ॥
यहि विधि बीति गयो दिन राती । दूसर दिन बीत्यो यहि भांती ॥
आपहु अन्न दियो मुख नाहीं । दुइ उपास परिगे घर माहीं ॥
तिसरे दिन बैठ्यो लै छूरी । कह्यो नाथ सों दुख भरि भूरी ॥
नाना आजु आइ घर मोरा । मोहिं कहैगो वचन कठोरा ॥
ठाकुर को नहिं दूध पियाये । तैं पूजन केहिं भांति नशाये ॥
तौ मैं ताहि ज्वाब का देहौं । ताते तुम्हरे पर मरि जैहौं ॥
अस कहि काटन लाग्यो कंठा । प्रगटे तुरत धनी वैकुंठा ॥
तीनिहुँ दिन कर किय पय पाना । नामदेव तब वचन बखाना ॥
सिगरो दूध तुम्हीं पी लेहो । की कुछ हमें पान हित देहो ॥

दोहा—अस कहि प्रभुको कर गह्यो, तब यदुपति मुसकाया ।

नामदेवको हाथ निज, दीन्ह्यो दूध पियाय ॥ ३ ॥

पुनि जब वामदेव घर आये । नामदेव तब तुरतहिं धाये ॥
वामदेव ते वचन बखाने । तुम बिन ठाकुर बहुत उबाने ॥
गोरस पियो दिवस दुइ नाहीं । दुइ उपास परिगे हमकाहीं ॥
तिसरे दिन कीन्ह्यो पय पाना । मौहूँ को दीन्ह्यो भगवाना ॥
वामदेव सचकित ह्वै गयऊ । नाती सों भाषत अस भयऊ ॥
कोउ है यह बातन कर साखी । नामदेव कह तब मुख भाखी ॥
का करिहौ साखी तुम नाना । बैठहु मम ढिग करि स्नाना ॥
नामदेव ढिग वामदेव तब । बैठत भो अचरज माने सब ॥
नामदेव तब घंट बजाई । कहत भयो पीजै प्रभु आई ॥

नहिं प्रगटे नानाके आगे । नामदेव तब कह दुख पागे ॥
मोरि बात तू खोय दई है । अबै न छूरी मोरि गई है ॥
तब प्रभु वामदेव के आगे । प्रगट भये पय पीवन लागे ॥

दोहा—वामदेव चरणन परचो, कीन्हो जयजयकार ॥

सत्य भक्त वत्सल अहैं, श्रीवसुदेव कुमार ॥ ४ ॥

वामदेव कछु कालहि माहीं । तनु तजि गवन्यो गोपुर काहीं ॥
नामदेव जग विचरन लागे । यदुपति भक्त जगत यश जागे ॥
बादशाह सुनि नामदेव यश । बोलवायो दिल्लीको जस तस ॥
शाह कह्यो अयान की नाई । करामात देखरावै साई ॥
नामदेव कह मैं नहिं जानौं । करामात सब रामहिं मानौं ॥
शाह कह्यो विन कछुक देखाये । जान न पैहौ कत इत आये ॥
नामदेव कह काह देखावहु । शाह कह्यो यह गाय जियावहु ॥
मरी रही सुरभी इक तहवाँ । नामदेव बैठे रह जहवाँ ॥
नेसुक लख्यो धेनु की ओरा । उठि बैठी सुरभी तेहि ठोरा ॥
शाह देखि अजमत पग परेऊ । देन लग्यो धन सो नहिं लयऊ ॥
तब इक रत्नजटित पर्यँका । नामदेव कहँ दिय अकलंका ॥
नामदेव पर्यँकहि पाई । तेहि उठवाय यमुन तट आई ॥

दोहा—तापर बैठे कछुक दिन, पुनि यमुना महँ डारि ॥

आप भजन करने लगे, हर्ष विषाद विसारि ॥ ५ ॥

दूत दौरिकै शाह पुकारा । सो साई पर्यँक तुम्हारा ॥
दियो डारिं दरियाव दहारै । नेवर नीक न कियो विचारै ॥
शाह कह्यो साई पै जाई । मम शासन यह देहु सुनाई ॥
तस पर्यँक रह्यो मम एका । हैं न हमारे भवन अनेका ॥
इक क्षणको दीजै सो हमहीं । हम बनवाय देव पुनि तुमहीं ॥
सुनत शाह शासन सब चरे । जाय नामदेवहि तिमि टेरे ॥

सुनिकै नामदेव मुसकाई । यमुन ओर जोह्यो शिरनाई ॥
 तब तैसहि पर्यंक हजार । यमुना तट निकसे इकवारा ॥
 नामदेव कह दूत बोलाई । अपनी होय सो लेहु उठाई ॥
 यह अचरज लखि धावन धाये । शाहहि सब वृत्तांत सुनाये ॥
 सुनिकै शाह तहाँ द्रुत आयो । नामदेव चरणन शिरनायो ॥
 निज अपराध क्षमावन लाग्यो । दिछीमहँ राखन अनुराग्यो ॥

दोहा—नामदेव तब शाहको, दियो एक पर्यंक ॥

और यमुन महँ डारिकै, तुरतहि चले अशंक ॥ ६ ॥
 विचरत विचरत पुनि इक ठाऊं । रहै कृष्ण मंदिर इक गाऊं ॥
 नामदेव आये तेहिं ग्रामा । दर्शन हेतु गये हरिधामा ॥
 रहे भजन गावत बहु साधू । संत समाज प्रमोद अगाधू ॥
 भीर देखि पांवरी उतारी । लियो तुरत फेंटा महँ डारी ॥
 भीतर मंदिरके जब आये । जूता लखि वैष्णव अनखाये ॥
 धक्का दै तेहि दियो निकारी । नामदेव तब विहाँसि सुखारी ॥
 लैकर झांझ पछीतहि जाई । गावनलागे झांझ बजाई ॥
 तब तेहिं दिशि भो मंदिर द्वारा । कोलाहल तहँ मच्यो अपारा ॥
 संत जाय सिंगरे शिरनाये । निज अपराध अगाध क्षमाये ॥
 नामदेव कछु कालहि माहीं । उठिकै गवने निज घर काहीं ॥
 कछु दिन आय बसे निज भवने । साधु दरश हित पुनि कहूँ गवने ॥
 इतै भवन महँ लागी आगी । जरी अनेकन वस्तु अदागी ॥

दोहा—आगि लागि सुनिकै तुरत, नामदेव तहँ आय ॥

रही बची कछु वस्तु जो, सोउ पावक फेंकवाय ॥ ७ ॥

आप झांझ लै युग करन, नाचन लगे तुरंत ॥

यह पद गावत भे हरषि, सकल सुनावत संत ॥ ८ ॥

भजन—अगिनि रूप प्रभु मेरे आजु आये ॥

धन्य मेरी भाग्य अस कौन सुख पाये ॥ १ ॥

मेरी घर वस्तु प्रभु सब लै लीन्ह्यो ।

नामदेव को आज धन्य जग कीन्ह्यो ॥ २ ॥

नामदेव जब किय पद गाना । आपहि ते तब अनल बुताना ॥

तब हरि ह्वैकै तुरत कवारी । क्षण महँ छानी दियो सुधारी ॥

नामदेवकी छानी जैसी । तीन लोक महँ रही न तैसी ॥

तब सब ग्राम निवासी आई । नामदेवसों कह शिर नाई ॥

नामदेव तब कह मुसकाई । असि छानी किमि बनै बनाई ॥

तन मन प्राण समर्पण कीन्हे । अस छानी बनती प्रभु चीन्हे ॥

एकादशी रहै इक काला । नामदेव व्रत कियो विशाला ॥

तब हरि विप्ररूप धरि आये । देहु अन्न अस वचन सुनाये ॥

भोजन बिन निकसत मम प्राणा । नामदेव तब वचन बखाना ॥

एकादशी आजु है भाई । भोजन दैहों कालिह मँगाई ॥

ब्राह्मण कह्यो आजुही लैहों । नातो तुम्हरे पर जिय दैहों ॥

दोहा—तबहूँ नहिं भोजन दियो, तब द्विज दिन भर बैठि ॥

रातिं द्वार पर मरिगयो, तासु गयो तनु ऐठि ॥ ९ ॥

यह सुनि सब जन निंदन लागे । नामदेव तब अति दुख पागे ॥

लै द्विजको तनु चिता बनाये । बैठ ताहि पर अनल लगाये ॥

उठि बैच्यो ब्राह्मण हँसि तबहीं । मनुजन लाग्यो अचरज सबहीं ॥

ब्राह्मण नामदेव सों गायो । लेन परीक्षा मैं इत आयो ॥

अस कहि भो द्विज अंतर्ध्याना । जयजयमाच्यो शोर महाना ॥

एक समय कौनेहु पुर माहीं । भई सुसंत समाज तहांहीं ॥

एकादशी जागरण रैना । करत रहैं सब साधु सचैना ॥

नामदेवहूँ तहँ चलि आये । भजन करत निशिअर्द्ध विताये ॥

जब इक संतहि लगी पियासू । नामदेव तब उठि अति आसू ॥

भक्तमाला ।

सलिल भरन वापी महुँ आयो । तब इक प्रेत रूप दरशायो ॥
महाभयावन लम्बशरीरा । नभ महुँ शिरपदमहि अतिजीरा ॥
नामदेव जब प्रेतहि पेख्यो । गायो यह पद ईश्वर लेख्यो ॥
भजन-भले विराजे लम्बक नाथ ।

धरणीपायँ स्वर्ग लों माथा योजन भरके हाथ ।

शिवसनकादिकपार न पावैं अनगनसखाविराजतसाथ ॥

नामदेवके आपहि स्वामी कीजै मोहिं सनाथ ॥

दोहा-जब यह पद गावत भये, तब वह प्रेत तुरंत ।

पाय चतुर्भुज रूप तहँ, भयो विकुंठ वसंत ॥ १० ॥

नामदेव लखि गुनियदुनाथा । नायो तासु चरण निज माथा ॥
पुनि जल भरि तेहि साधु पियायो । भोर भये निज भवनहि आयो
तहाँ कछुक दिन वसत बितायो । नामदेव पंढरपुर आयो ॥
साहुकार तहाँ यक रहेऊ । कोटिध्वजी ख्याति जन कहेऊ
सो इक समय सुवर्ण तुला में । चढ़तो भयो चौथ बहुला में ॥
कनक बांटी सब विप्रन दीन्ह्यो । नामदेव तहँ गवन न कीन्ह्यो ॥
नामदेव को साहु बोलायो । जसतसकै सो तहँलों आयो ॥
हेम देन लाग्यो नहिं लीन्हें । ताहि दान अभिमानी चीन्हें ॥
नामदेव सब कह अधिकाना । तुलसीदल भारि दीजैसोना ॥
अस कहि इक दल लिख्यो रकारा । धरि दीन्ह्यो तेहि तुलामँझारा
साहु कह्यो कत कीजत हांसी । यामें तो नहिं रतिहु तुलासी ॥
नामदेव कह इतनहि लैहौं । इतनेमें संतोषित जैहौं ॥

दोहा-सो तुलसीदल ओर इक, एक ओर कछु सोन ।

धरत भये तौलत भये, भयोवरावरसो न ॥ ११ ॥

घर भरकी संपति मँगवाई । एक ओर दिय साहु धराई ॥
सो तुलसीदलको नहिं तूल्यो । कनक सहस मन ऊपर झूल्यो ॥

नामदेव तब कह मुसकाई । जौन किये तैं सुकृति महाई ॥
 सो कुश जल लै धरु पलरामें । सो तुलसीदल तौल तुलामें ॥
 साहु तबै व्रत तीरथ दाना । धरयो तुला महँ वचन प्रमाना
 तबहुँ तुल्यो न तुलसीदल को । लाग्यो अचरजमनुजसकलको
 साहु त्राहि कहि गिरयो चरणमें । नामदेव पद पकरि करनमें ॥
 बोल्यो वचन आजु लों मेरो । रह्यो विश्वास दानही केरो ॥
 कनक दानहू ते गोदानौ । होत अधिक यह वेद बखानो
 पै अब धेनु दान गोदानौ । नाम ते अधिक नाथनहिमानौ ॥
 नामदेव तब करि अति दाया । हरिपद प्रीति प्रतीति सिखाया ॥
 नामदेव भाष्यो पुनि वैना । सुरभी दान छोड़ जग हैना ॥

दोहा—साहु कह्यो गोदान अब, काहे करौ वृथाहिं ।

नामदेव इतिहास तब, कह्यो महाजन पाहिं ॥ १२ ॥

एक वणिक कौन्यो पुर ठयऊ । कबहुँन इक वराटिका दयऊ ॥
 मरन लग्यो तब ताके भाई । बूढ़ि गाय इक दियो देवाई ॥
 मरिक्कै जब यमपुर महँ गयऊ । तब यम चित्रगुप्त सों कहेऊ ॥
 याक्के पाप पुण्य करु लेखा । चित्रगुप्त कह पाप अलेखा ॥
 मरत समय दिय बूढ़ी गाई । तौने भरि मोहिं सुकृतिदेखाई
 ताते द्वै घटिका पर्यन्ता । जो चाहै सो लहै तुरन्ता ॥
 फेरि नरक है कोटिन वर्षा । वणिकहि तब यम कह्योसहर्षा
 द्वै घटिका भरि जो मन होई । तोको गाय देयगी सोई ॥
 वणिक गाय ठिग तुरत सिधारा । कह्यो मनोरथ देय हमारा ॥
 गाय कह्यो तोसों कहि पाऊं । सो तुरंत तोको दरशाऊं ॥
 वणिक कह्योयम गुद महँशृंगा । मातु डारिये यही उमंगा ॥
 धाई धेनु तुरत यम ओरा । भाग्यो यम चितवत चहुँओरा ॥

दोहा—लियो रपटि सुरभी तुरत, वणिक पूँछ गहि तासु ।

पाछे पाछे चलतभो, माने परम हुलासु ॥ १३ ॥

कहुँ न बचेजब गो विधिअयना । सुरभीको वारयो वसुनयना ॥
 वणिक कह्यो इनहूको तैसो । करु सुरभी मम मानस ऐसो ॥
 तबहिं धेनु ब्रह्मौ पहुँ धाई । करतारहु तब चले पराई ॥
 यम विरंचि वैकुंठ सिधारे । पाछे सुरभी वणिक निहारे ॥
 इतने में घटिका द्वै बीती । धाये दूत देत अति भीती ॥
 पकरयो वणिक डारि गलफांसी । तेहिं लै चले देत दुखरासी ॥
 वणिक तबहिं असकियो पुकारा । त्राहि त्राहि वसुदेवकुमारा ॥
 वेद पुराण भाषि अस दयऊ । तुव पुर आइ कोउ नहिं गयऊ
 जो अब यम भट मोहिं लैजैहैं । वेद पुराण मृषा सब ह्वै हैं ॥
 यह सुनि हरि पार्षद द्रुत धाई । वणिकहि लीन्ह्यो तुरतछुड़ाई ॥
 तेहि विकुंठ महँ दियो निवासा । मिटिगै सकल वणिककी त्रासा ॥
 अस प्रभाव जानहु गोदानै । पै नहिं अधिक नाम ते मानै ॥

दोहा—अधिक जानियो नाम जे, नामी ते तुम साहु ।

तासु कहौ इतिहास मैं, सुनिये सहित उछाहु ॥ १४ ॥

एक समय नारद ऋषिराई । पारिजातको फूलहि ल्याई ॥
 दियो रुक्मिणीके धरि शीशा । बैठि रहे जहँ यदुकुल ईशा ॥
 खबरि सत्यभामा यह पाई । बैठि रही करि मान महाई ॥
 हरि आये तब कह्यो रिसाई । दियो फूल निवसौ तहँ जाई ॥
 हरिकह पारिजात तरु पाई । तेरे घर महँ देहुँ लगाई ॥
 अस कहि जाय स्वर्ग महँ नाथा । जीत्यो सुरन गहे धनु हाथा ॥
 पारिजात को पादप ल्याई । दिय सतिभामा भवनलगाई ॥
 पुनि नारद सतिभामा भवनै । कौतुक करन हेतु किय गवनै
 करि प्रणाम सतिभामा बोली । यह उपाय दीजै मोहिं खोली

जन्म जन्म मम पति हरि होवैं । हम क्षणभरि विछोहनहिंजोवैं
नारद कह्यो देतहै जोई । पावत जन्म जन्म है सोई ॥
ताते करहु कृष्ण को दानै । पैहौ जन्म जन्म भगवानै ॥

दोहा—तब सतिभामा कृष्णको, नारदको दिय दान ॥

हरिको नारद ले चलै, चरो करत बखान ॥ १५ ॥

जानि विछोह तुरत सतिभामा । नारदसों बोली दुख छामा ॥
अबहीं करहु विछोह ऋषीशा । उलटो मोहिं दान फल दीशा ॥
नारद कह्यो सत्य तू गावै । कारो दानहि कौन पचावै ॥
इनको तोलि रत्न मोहिं देहू । जन्म जन्म अपनो पति लेहू ॥
तब पति काहँ तुला बैठाई । एक ओर धरि मणि समुदाई ॥
तौलन लगी कृष्ण को जवहीं । रत्न बराबर भे नाहिं तबहीं ॥
तबहिं सदनकी सम्पति ल्याई । एक ओर दिय तुला चढ़ाई ॥
भई बराबर हरिके नाहीं । रुक्मिणि आई तुरत तहांहीं ॥
लीन्ह्यो सम्पति सकल उतारी । एक रत्न अपने कर धारी ॥
कृष्ण गुगल अक्षर लिखितामें । धरि दीन्ह्यो तहँ तुरत तुला में ॥
तब हरिको पलरा उठि गयऊ । पलरा नाम केर महि ठयऊ ॥
ताते नामी ते गुर नामा । जानहु सत्यसाहु मतिधामा ॥

दोहा—नामदेव कहि साहु सों, यह अनुपम इतिहास ॥

भक्ति रीति सिखवाय कै, मेटि दियो भवत्रास ॥ १६ ॥

नामदेवके भांति यह, जानहु चरित अनेक ॥

मैं कहँ लगि वर्णन करौं, मुख में रसना एक ॥ १७ ॥

इति श्रीरामरसिकावल्यां कलियुगखंडेअष्टाविंशोऽध्यायः ॥ २८ ॥

अथ जयदेवकी कथा ॥

दोहा—अब वरणों जय देव को, चरित परम कमनीय ॥

जासु काव्य कविकुल कमल, भयो भानु रमणीय ॥ १८ ॥

तीनि जन्म लगि हरि रति रीती । करत भयो यदुनाथ प्रतीती ॥
 गाथा प्रथम जन्म की गाऊं । श्रोता श्रवण सुधार सुनाऊं ॥
 देश एक कर्नाटक नामा । तहाँ रह्यो मथुरा इक ग्रामा ॥
 तहँ एक वणिक धनिक अति ठयऊ । सो एक गणिका के वश भयऊ
 रोजहि जात तासु घर माहीं । क्षण भर नहिं वियोग सहि जाहीं ॥
 एक समय रह भादँव मासा । अंधकार लेपित दश आसा ॥
 वर्षत रहे जलद जल धारा । नदी नार तजि दिये करारा ॥
 अर्द्ध निशा अस बीती जबहीं । वणिक चलयो गणिका गृह तबहीं
 गणिका भवन रह्यो सरि पारा । पैरत पार भयो सरि धारा ॥
 गयो वारतिय जबहिं दुवारे । रहे बंद तहँ भवन केवारे ॥
 तब पछीत है सो चढ़ि गयऊ । झूलत तहँ भुजंग इक रहेऊ ॥
 तेहि रज्जू भ्रम निज कर धारी । गवन्यो गणिका ऊँचि अटारी ॥
 दोहा—ताहि जगायो नाम कहि, गणिका लखिकै ताहिं ॥

अति अचरज मानत भई, किमि आयो घर माहिं ॥
 वणिक कह्यो आपनो हवाला । तब निंदन लागी तेहि काला ॥
 जस तुम कियो प्रीति मोहिं माहीं । तस भजत्यो जो हरिपद काहीं ॥
 दोऊ लोक सुधारि तब जाते । कबहुँ न यमके भट पछियाते ॥
 वणिक कह्यो को हरि प्रभु भारी । मोहिं बताउ दुराउ न प्यारी ॥
 तब तेहिं भवन माहिं इक ठामा । लग्यो चित्र सुंदर वनझ्यामा ॥
 तेहि बताय गणिका अस गायो । येई प्रभु यदुनाथ सोहायो ॥
 वणिक ग्लानि मानी मन भारी । लियो तुरत तसबीर उतारी ॥
 सो पट लै गवन्यो सरि तीरा । बैक्यो धरा ध्यान धारि धीरा ॥
 कहै चित्रसों अहै अभीती । प्रगटहु नाथ मानि परतीती ॥
 बीते कहत ताहि दिन सातै । बिना अन्न विन जल बतरातै ॥
 लगी रटन मुख प्रगटहु नाथा । रह्यो नताके कोउ तहँ साथी ॥



तन मन तासु जग्यो हरि माहीं । दूसर सुरति रही तेहिनाहीं ॥

दोहा—सतयें दिवस विकुंठ महँ, संकट गो हरिकाहिं ।

प्रगट भये तसवीर ते, श्रीयदुनाथ तहाँहिं ॥ २ ॥

कह्यो वणिकसों प्रभु यहि रीती । प्रगट्यो मैं लखि तोर प्रतीती ॥

हैहो द्विज तजि वणिक शरीरा । मम प्रसाद ते बुद्धि गँभीरा ॥

करुणामृत रचिहौ जब ग्रंथा । तब पैहौ विकुंठकी पंथा ॥

हैंगै शुद्ध बुद्धिं हरिदेखे । वणिक कह्यो तब मोद अलेखे ॥

दीजै नाथ मोहिं वरदाना । जब लगि चहौं करौं गुणगाना ॥

हरि कह तीनि जन्म लगि प्यारे । गावहु सुंदर सुयश हमारे ॥

यही जन्म महँ ग्रंथ बनायो । नाम शृंगार समुद्र धरायो ॥

द्वितीय जन्म करुणामृत करहू । ते सुनाय पापिन उद्धरहू ॥

तृतीय जन्म रचि गीतगोविंदा । हैहौ गोपुर केर वसिंदा ॥

अस कहि भे हरि अंतर्ध्याना । वणिक लग्यो विचरन थल नाना ॥

तब शृंगार समुद्र सु ग्रंथा । विरचो जामें हरि रति पंथा ॥

तजो शरीर पाय कछु काला । भयो जन्म द्विज भवन विशाला ॥

दोहा—बाल कालते करत भो, हरिमैं अति अनुराग ।

बाल कालसे कालसे, किय जगजालहिं त्याग ॥ ३ ॥

विचरन लाग्यो जगत अभीता । करत अपावन परम पुनीता ॥

रच्यो ग्रंथ करुणामृत नीको । जो साहित्य शास्त्रको टीको ॥

बहुत काल लगि धरचो शरीरा । गायो कृष्ण सुयश मतिधीरा ॥

तज्यो शरीर जन्म जब पायो । तब जयदेव नाम कहवायो ॥

श्रीजयदेव चक्रवर्ती कवि । रचो गीतगोविंद ग्रंथ रवि ॥

जो कोउ अष्टपदी मुख गावै । राधारमण चरण रति पावै ॥

संत कुल भाना । तासु कथा अब करौं बखाना ॥

किंदु बिल्व नामक इक ग्रामा । तामें जन्म लियो मति धामा ॥

बालकाल ते हरि अनुरागी । भयो विरक्त विषय रस त्यागी॥
जेहि तरु तरे नींद निशि गहरी । तेहि तरु तरे बहुरि नहि रहरी
गुदरी वपुष कमंडलु हाथा । भजन करै कोउ रहै न साथी॥
काशीमें कोउ इक द्विज भयऊ । जगन्नाथ दर्शन हित गयऊ॥

दोहा—विनय कियो जगदीश सों, देहु नाथ संतान ।

सो मैं तुमहीं अर्पिहों, ग्रहण कियो भगवान ॥ ४ ॥

अस कहि जबै बहुरि घर आयो । कन्या जन्म नारि महँ पायो॥
भई वर्ष दश जबै कुमारी । सुता सहित द्विज पुरी सिधारी॥
प्रभु सों विनय कियो करजोरी । लेहु समर्पित दुहिता मोरी ॥
अस कहि द्विज डेरा महँ आयो । प्रभु मंडन कहँ निशि सपनायो
कह्यो जाय द्विज काहँ बुझाई । कन्याको तुरंत लैजाई ॥
किंदुबिल्व नामक इक ग्रामा । तहँ जयदेव बसै मतिधामा ॥
मोर रूप तेहि देय कुमारी । अनुचित उचित न नेकु विचारी॥
द्विज दुहिता ले तुरतहि गयऊ । किंदुबिल्व महँ आवत भयऊ
लख्यो वृक्ष तर श्रीजयदेव । गाय सुयश करते हरि सेव ॥
द्विज कह लीजै मोरि कुमारी । जगन्नाथ शासन शिरधारी ॥
बोले तब जयदेव प्रवीन । तू बावरो अहै मतिहीना ॥
नहि गृह नहि धन नहि तनु जोरा । नाहि विवाह मनोरथ मोरा॥

दोहा—जगदीशैको जायकै, देहु सुता सविचार ।

नारि लालसा उनहि के, तिय युग अष्ट हजार ॥५॥

द्विज जयदेव वचन नहि मान्यो । कन्यासों पुनि वचन बखान्यो॥
हम दै चुके तोरि पति येई । जन्म वितावहु इन कहँ सेई ॥
अस कहि द्विज गवन्यो घर काहीं । बोले तब जयदेव तहाँहीं ॥
काँ सुख लहि इत रहहु कुमारी । मैं तौ जन्महि केर भिखारी ॥
कन्या कह्यो होय जो चाहै । या तनुके तुमहीं हो नहै ॥

तहँ वसि कुटी एक रचि लीन्ह्यो। पद्मावती नाम तेहि दीन्ह्यो ॥
तहँ यदुपतिकी मूर्ति पधारी। सेवा पूजा करै सुखारी ॥
गीतगोविंद बनावन लागे। यदुपति चरण चारु अनुरागे ॥
रचत रचत जब यह पद आयो (स्मरगरलखंडनं मम शिरसि-
मंडनं धेहिपदपल्लवमुदारं) । तब जैदेव सोच अधिकायो ॥
श्रीवृषभानु सुत पद काहीं। अनुचित कहव कृष्ण शिरमाहीं ॥
पै आवै सोइ पद नहि आना। तब उठि गये करन स्नाना ॥
तब जयदेव स्वरूपहि धारी। आये हरि लै पुस्तक प्यारी ॥

दोहा—पुस्तकमें लिखि पद सोई, जात भये यदुराय ।

खोल्यो पुस्तक आयकै, श्रीजयदेवनहाय ॥ ६ ॥

हरिकर अक्षर लिखित विलोकी। तियसों कहत भये अति शोकी
को खोल्यो मम पुस्तक आई। बोली वाम वचन मुसकाई ॥
तुमहीं खोल्यो पुस्तक आई। मज्जन हित पुनि गये सिधाई ॥
तब जयदेव जानि प्रभु काहीं। कियो तियहि दंडवत तहाँहीं ॥
जन्म प्रयंत सेव हम कीन्ह्यो। नाथ आय दर्शन तोहि दीन्ह्यो ॥
गीतगोविंद समग्र बनायो। हरि प्रभाव जगमाहँ चलायो ॥
प्रचर्यो जगत गीतगोविंदा। गावैं उभय सुमति मतिमंदा ॥
श्रीजगदीश पुरी चहूँ ओरा। गावहि नारि पुरुष सब ठोरा ॥
रहै पुरी को राजा जोऊ। गीतगोविंद रच्यो इक सोऊ ॥
कह्यो पंडितन याहि चलाओ। नहि जयदेव भणित मुख गाओ
पंडित कह्यो चली यह नाहीं। हरिदाया जयदेवहि माहीं ॥
राजा और पंडितन केरो। भयो-पुरीमहँ वाद घनेरो ॥

दोहा—यह सिद्धांत परचो तहाँ, दोउ पुस्तक हरि पास ।

धरि दीजै हरि उर सोई, मिलै सो होय प्रकास ॥ ७ ॥

दोउ पुस्तक धरि नाथ अगारा। कढ़ि आये करि बंद किवाँरा ॥

दंड द्वैक महँ खोलि कपाटा । लखे जाय सब अनुपम ठाटा ॥
 कृत जयदेव गीतगोविंदा । धरयो आपने उरहि मुकुंदा ॥
 गीतगोविंद रचित नृप केरो । दूरी परो रहै सब हेरो ॥
 तब राजा मन मानि गलानी । बूढ़न चलयो सिंधु दुख मानी ॥
 भइ अकाश वाणी नृप काहीं । मति बूढ़ै संशय कछु नाहीं ॥
 द्वादश सर्गन प्रति श्लोका । इक इक रचहु तजहु मनशोका ॥
 ते द्वादश श्लोक तिहारे । चलिहैं तीनिउँ लोक उदारे ॥
 तब राजा अति आनँद पायो । शुभद्वादश श्लोक बनायो ॥
 सर्ग सर्ग प्रति एक श्लोक । राजा के जानहु माते ओक ॥
 एक समय सो पुरी मँझारी । मालिन की एक रही कुमारी ॥
 सो टोरत कहूँ भाटन काहीं । गावै यह पद निज मुख माहों ॥

पद—धीरसमीरे यमुनातीरे वसति वने वनमाली ।

दोहा—तेहि निशिके परभातमें, पंडा खोलि किवाँर ।

लखत भये जगदीशके, फारे वसन अपार ॥ ८ ॥

तब राजा को जाय जनायो । राजहु द्रुतहि धाय तहँ आयो ॥
 अचरज मानि भूप अरु पंडा । धरन कियो दुख जानि अखंडा
 स्वप्न माहँ तब कह हरिदेवा । गीतगोविंद जो किय जयदेवा ॥
 सो मोहिं प्राणनते अति प्यारा । जो गावै घर पंथ वगारा ॥
 ताके पीछे पीछे वागैं । ताहि सुनन को अति अनुरागैं ॥
 है एक मालिनि केरि कुमारी । भाटन तोरत गावत प्यारी ॥
 धीर समीरे यह पद गायो । ताहि सुनन हित मैं तहँ धायो ॥
 भाटन काँटन सब पटफाटे । कोउ वारण हित ताहि न टाटे ॥
 निशि पर्यन्त तासु सँगवाग्यो । गीतगोविंद सुनत अनुराग्यो ॥
 यह हरिको शासन सुनि धाई । पंडा कह्यो भूप सो जाई ॥
 भूपति सुनि माली कन्याको । बोल्यो तुरत पठै शिबिका को ॥

तेहि पद परशि धन्य मुख गाई । पुरी मध्य डौंडी पिटवाई ॥

दोहा—गावै गीतगोविंद जो, सो सुंदर थल माहिं ।

गीतगोविंदहि सुनन को, यदुपति हठि तहँ जाहिं ॥९॥

यह हवाल एक मुगुल सुन्यो जब । गीतगोविंद पढ़न लाग्यो तब ॥

पढ़िकै गीतगोविंद मलेच्छा । वागन लाग्यो पुरी यथेच्छा ॥

चढ़ो तुरंग यही पद गावै । बहुरि बहुरि पाछे टक लावै ॥

(पद) संचरदधरसुधामधुरध्वनिमुखरितमोहनवंशम् ॥

हरि आगे आगे तेहि केरे । वागत फिरै न सो दृग हेरे ॥

पीछे लखै लखै हरि नाहीं । तब उपजी संशय उर माहीं ॥

भ्रम्यो तीनि दिन सो पद गायो । नाहिं हरिको दर्शन सो पायो ॥

चौथे दिवस बंद किय गाना । तब आरत हित भे भगवाना ॥

अंतर्ध्यान भये हरि जवहीं । मरचो तुरंत तुरंगहि तबहीं ॥

मुगुल महामन मानि गलानी । पीछे और नयन टक तानी ॥

मुर्च्छितहै महि में गिरिपरेऊ । तब हरि दौरि पकरि कर लयऊ ॥

हरिकह विह्वल कत मुगुलेशा । हरिको जोहि कह्यो यमनेशा ॥

मैं अस सुन्यो आपने काना । करै जो गीतगोविंदहि गाना ॥

दोहा—पीछे पीछे तासु हरि, वागत हैं दिन रैन ।

पीठि ओर ताते कियो, तीनि दिवस भरि नैन ॥१०॥

तुमको लखत टूटि गइ ग्रीवा । देख्यो मैं नाहिं आनंद सीवा ॥

हरि कह मैं आगे तुव रहेऊ । ताते मोर दरश नाहिं लहेऊ ॥

मांगु मांगु जो अब मन आवै । तोहिं न कछु दुर्लभ मोहिं भावै ॥

तब मलेच्छ मांग्यो कर जोरी । तुरंग समेत होय गति मोरी ॥

एवमस्तु कहि यदुकुल राया । तहँते अपनो रूप छिपाया ॥

यमन जरूर तुरंग समेता । गवन्यो कृपानिकेत निकेता ॥

पै औरहु कौतुक कछु सुनिये । हरि प्रभाव अचरज नाहिं गुनिये

चाम ऊन लोहादिक केते । बाजी साजु रचे जन जेते ॥
ते तुरंत हरिलोक सिधारे । जो तुरंग भूषणहुँ सवारि ॥
तामैं प्रियादास हरिदासा । यहि कवित्त को कियो प्रकासा ॥

कवित्त-और सुनौ महिमा हरिकी, अति अद्भुतता कहि
जात न भारी । चाम लगाम औ जीनमें ऊन, लग्यो जेहि जीव
को अश्व ममझारी ॥ औरहु भूषण वस्त्र तुरंग सजे जिन अंगन
अंग सवारि । ते मुगुलेश शरीरको पशि गये हरिलोक भौ
बंधन टारी ॥१॥ ऐसो गीतगोविंद प्रभाऊ । श्रोता जानहु भेद न
काऊ ॥ गीतगोविंद प्रभाव महाना ॥ कहँ लगि करिये वदन बखाना
दोहा-सुकवि चक्रवर्ती महा, श्रीजयदेव उदार ।

तासु कथा अब कहतहौं, सहित कछुक विस्तार ॥११॥
एक समय जयदेव सुजाना । तीर्थ करनको कियो पयाना ॥
चोर मिले मारग महँ चारी । ते जयदेवहिं गिरा उचारी ॥
जैहौ कहां पथिक बतराऊ । कह जयदेव तीर्थ हित जाऊ ॥
चोर कह्यो सँग भो पथ माहीं । जहाँ जाहु हमहु तहँ जाहीं ॥
अस कहि चले संग पथ चोरे । रह जयदेव पथिक के भोरे ॥
संत खवावन हित अति चोरी । मोहर लिये रहे सँग थोरी ॥
चारि चोर चामीकर हेतू । किय मारन जयदेवहिं नेतू ॥
जानि गये जयदेव हवाला । चोरन दियो कनक तत्काला ॥
चोरन संग चले पथ जाहीं । चोर सबै शंकित मन माहीं ॥
आपसमें संमत अस कीन्ह्यो । मांगे बिना कनक यह दीन्ह्यो ॥
ताते परी जहां पुर भारी । पकरैहै हाठि मारि गोहारी ॥
ताते मारग महँ यहि मारी । कनक लिहे पुनि चलौ सुखारी ॥

दोहा-कोउ कहि दीन्ह्यो कनक यह, जिय मारव बड़ दोष ।
कोउ कह कर पद काटिकै, चलहिं मानि परितोष ॥

अस कहि चौर सुशील सरूपा । चले पंथ मिलिगो इक कूपा ॥
 तब तुरंत जयदेवहिं डाटी । डारचो कूप पाणि पद काटी ॥
 कूप माहँ जयदेव सुजाना । बीति गई निशि भयो विहाना ॥
 तोन देशको तब नरनाहा । गवन्यो मृगया हित नरवाहा ॥
 निकस्यो तौन कूप के तीरा । निरख्यो जयदेवहि युतपीरा ॥
 मचिया डारि तुरंत निकासी । जान्यो संत देखि दुति रासी ॥
 राजा निज पालकी चलाई । मुरख्यो भौन महा सुख पाई ॥
 भिषक बोलाय कराय उपाई । तुरत अंग के घाव मिटाई ॥
 पूछ्यो यह कस भयो गोसाईं । तब जयदेव कह्यो मुसक्याई ॥
 रह्यो ऐसही मोर शरीरा । नहिं वृत्तांत कह्यो मतिधीरा ॥
 यहि विधि रहन लगे जयदेवा । नृपहिं बतायो साधुन सेवा ॥
 राजा जैदेवहिं सँग पाई । लाग्यो करन साधु सेवकाई ॥

दोहा—आवन लागे साधु बहु, भूपति करि सत्कार ॥

यथायोग्य धन दै तिन्हें, करतो विदा उदार ॥ १३ ॥
 यह यश फैलि गयो जग माहीं । विदित भयो तेउ चोरन काहीं ॥
 चारिहु चोर साधु वपुधारी । आये भूप भवन पगुधारी ॥
 लोगन सों पूछ्यो कहँ जाहीं । लोगन कह स्वामी ठिग माहीं ॥
 तब जयदेव निकट गे चोरे । चीन्हि भये सिंगरे भय भोरे ॥
 चीन्हि तिन्हें उठिकै जयदेवा । मिलत भये मानहुँ हरिदेवा ॥
 एकहि आसन में बैठायो । राजाको पुनि खबरि पठायो ॥
 आये जेठे बंधु हमारे । भूपति सुनत तुरत पगु धारे ॥
 गुरु को जेठो बंधु विचार्यो । करि प्रणाम अतिशय सत्कारचो ॥
 दियो भवन के भीतर डेरा । दिय भोजन पकवान घनेरा ॥

महँ अस चोर विचारे । वध हित हमहिं भीतरहिं डारे ॥
 वैर विशेषहि अपने । जयदेवहिं सो बात न सपने ॥

करने लगे गवन अतुराई । गुरु को भूपति खबरि जनाई ॥

दोहा-बड़े भ्रात गुरु रावरे, रहत न अब यहि भौन ॥

बहुत भांति रोंक्यों तिन्हें, करहिं यतन अब कौन १४
तब जयदेव कह्यो अस वानी । विदा करे धन दै सन्मानी ॥
तब भूपति दै धन समुदाई । कीन्ह्यो संतन केहि विदाई ॥
चारि भृत्य दीन्ह्यो सँग माहीं । जामें कहुँ लूटि नहिं जाहीं ॥
बहुत दूरि लगि गे जब चारे । भूप भृत्य तब वचन उचारे ॥
जस तुमको नरपति सन्माना । तस सत्कार लह्यो नहिं आना ॥
जेठे बंधु अहौ गुरु केरे । यही हेत परतो मन मेरे ॥
चारिहु चोर तबै अस भाषा । कहहिं कथा जनि मानहु माषा ॥
स्वामी स्वामी जे कहवामैं । ते अरु हम इक समय सकामैं ॥
गये एक भूपति भट भारे । राख्यो सो चाकर सत्कारे ॥
तब यह कियो कुकर्म महाना । कोप रूप भो भूप सुजाना ॥
हमैं कियो शासन अस घोरा । याको शिर काटहु यहि ठोरा ॥
तब हम अपनो हितू विचारी । काटि चरण कर गये सिधारी ॥

दोहा-इतना चोरन के कहत, सही मही नहिं पाप ॥

फाटि गई प्रगट्यो विवर, लहे चोर अति ताप ॥१५॥
सोई विवर चारिहु चोरा । गिरि कै गये रसातल घोरा ॥
तहैं कवित्त कीन्ह्यो प्रियदासा । करौं अंत तुक ताहि प्रकासा ॥

कवित्त-फाटि गई भूमि सब ठग वे समाय गये,

भये ये चकित दौरि स्वामी जूपै आये है ॥ १ ॥

राजदूत स्वामी ढिग आये । चोरन को वृत्तांत जनाये ॥
श्रीजयदेव सुनत सो हाला । मीजत कर अति भये विहाला ॥
मीजत कर कर पद ह्वै आये । दौरि दूत भूपतिहि जनाये ॥
राजहु आय देखि ठगि रहेऊ । पूछत भो जयदेव न कहेऊ ॥

पुनि हठ परचो भूप गुरु पाहीं। तव जयदेव दुखित मन माहीं ॥
सिगरो निज हवाल कहि गयऊ। सुनि राजा अति विस्मित भयऊ ॥
पुनि जयदेव नाम अस गायो । सुनि नरनाह मोद अति पायो ॥
देखहु श्रोता संत सुभाऊ । ऐसेहु पर अपकार न भाऊ ॥
यदपि चोर शठता असि कीन्ह्यो। श्रीजयदेव न चित कछु दीन्ह्यो ॥
रक्षत संतन को भगवाना । मरै पाप ते पापि निदाना ॥

दोहा—जो जासों करतो बदी, बदी ताहि धरि खाय ॥

कन्या सोवै कुँवर घर, बाबहि भालु चबाय ॥ १६ ॥
याको सुनहु यथा इतिहासा । श्रोता देखहु बड़ो तमासा ॥
यक पाखंडी बाबा आयो । राजद्वार में स्वाल सुनायो ॥
भूपति सुता उत्तंग अटारी । खड़ी रही भूषण पट धारी ॥
बाबा ताहि विलोकत मोह्यो । बार बार ताको तन जोह्यो ॥
बाबहि भूपति के भट आई । दीन्ह्यो भीख अन्न समुदाई ॥
बाबा कह्यो भीख नहिं लैहों । राजाको मिलिकै पुनि जैहों ॥
कछु मंगल कहि हों नरपति को । देहों मेटि अमंगल गतिको ॥
भूपति भृत्य भूप ठिग जाई । बाबा की कहनूति सुनाई ॥
भूपति बाबै निकट बोलायो । साधुहि जानि भूप शिरनायो ॥
बाबा कह्यो और सब नीको । एक बात ते सिगरो फीको ॥
सुता रावरी दोषित जोई । याते अधिक अधिक दुख होई ॥
याको परित्यागन करि देहू । तो जगमें सुख सम्पति लेहू ॥

दोहा—राजा बाबा के वचन, मन में सांचो जानि ।

सुता त्यागि करिबो चह्यो, महादोष तेहि मानि ॥ १७ ॥
विशद दारु मंजूष बनाई । तामें निज दुहिता बैठाई ॥
दीन्ह्यो गंगा धार बहाई । बाबा तुरत खबरि यह पाई ॥
सो मंजूषा पाय प्रवाहा । लाग्यो एक नगर नर नाहा ॥

राजकुमार नहात रह्यो सो । लखि मंजूषा पैरि गह्यो सो ॥
 भवन लाय मंजूष उधारी । देख्यो अनुपम राजकुमारी ॥
 ताहि भवन महुँ सो बैठायो । बड़ो भालु मंजूष धरायो ॥
 पुनि गंगा महुँ दियो बहाई । पीछे बाबहु पहुँच्यो जाई ॥
 पूछ्यो पुरवासिन सों बाता । मंजूषा बहतो इत जाता ॥
 || पुरवासिन कह दूरि गयो सो । बाबा अति द्रुत चलत भयो सो ॥
 पकरे मंजूषै चलि दूरी । बाबा आनँद मान्यो भूरी ॥
 मोर मनोरथ पूरण भयऊ । अनुपम लाभ विधाता दयऊ ॥
 अस कहि मंजूषा जब खोला । रोषित निकसि भालु तब ठोला
 दोहा-बाबा को लपट्यो लपकि, डारयो वदन विदारि ।

भालु भागि वनको गयो, बाबा मरचो पुकारि ॥ १८ ॥
 भई दशा तस्करन तैसही । ऐसेन चाही अवशि ऐसही ॥
 पुनि भूपति सुपकाल पठायो । पद्मावती तुरंत बोलायो ॥
 पद्मावती और जयदेवा वसे । तहाँ विरचित हरि सेवा ॥
 एक समय राजा की रानी । पद्मावति अंतहपुर आनी ॥
 कीन्ह्यो विविध भाँति सत्कारा । बैठी निकट भूप की दारा ॥
 नृपतिय नैहर ते खत आयो । तासु बंधु सुरलोक सिधायो ॥
 रानी की सिगरी भौजाई । जरी कंत सँग चिता बनाई ॥
 यह सुनि रानी कियो विलापा । फेरि प्रशंसा कियो अमापा ॥
 पद्मावती कह्यो मुसकाई । यहू न सत्य पतिव्रतताई ॥
 जो पति मरन सुनै तिय काना । तजै तुरंत नहीं निज प्राणा ॥
 सो तिय है नाहिं सत्य सुकीया । तब रानी बोली रमणीया ॥
 तुम्हें छोंड़ि अस को जग करई । पै जो कहै सो नाहिं परिहरई ॥
 दोहा-आई गृह पद्मावती, रानी रच्यो उपाय ।

गे महीप मृगया जबै, तब इक पुरुष बनाय ॥ १९ ॥

कह्यो जाय पद्मावति पार्हीं । आयो यह नृप भृत्य इहांहीं ॥
 सो अस भाषत सत्य हवाला । स्वामी भये आजु वश काला ॥
 पद्मावती कह्यो मुसकाई । अछत अहै मन पति सुखदाई ॥
 रानी भई चकित सुनि वानी । भूपतिसों अस दशा बखानी ॥
 भूपति वारण किय बहु बारा । गुरू परीक्षा करु न अवारा ॥
 रानी परी महा हठ माहीं । किहे परीक्षा विन कल नाहीं ॥
 राखिय यदापि वारि उर माहीं । युवती शास्त्र नृपति वश नाहीं ॥
 राजा इक दिन गयो शिकारे । तब रानी पुनि वचन उचारे ॥
 आजु सत्य स्वामी गति पायो । भाषत राजदूत यक आयो ॥
 पद्मावती कह्यो गुनि इच्छा । चहो लेन तुम मोरि परीच्छा ॥
 अस कहि तुरत त्यागिदिय प्राणा । माच्यो हाहाकार महाना ॥
 लगे करन नृप आय विलापा । रानी दुसह लह्यो परितापा ॥

दोहा—तब जयदेव तुरंत तहँ, आय गह्यो कर वीन ।

गावन लागे पद यही, राग विहाग प्रवीन ॥ २० ॥

पद—ललित लवंग लतापरिशीलन कोमल मलय समीरे ।

मधुकर निकर करं वित कोकिल कूंजित कुंजकुटीरे ॥

जब यह पद गायो जयदेवा । तब कौतुक कीन्ह्यो यदुदेवा ॥
 पद्मावती तुरत उठिबैठी । लखि पति मोदसिंधु महँपैठी ॥
 मच्यौ नगर महँ जयजयकारा । धन्य धन्य जयदेव कुमारा ॥
 राजा मान्यो बहुत गलानी । समझायो गुरु कहि शुभ वानी ॥
 पुनि गंगा मज्जन के हेतू । गवने उत्तर संत समेतू ॥
 कीन्ह्यो जाय एक थल वासा । गंगा मज्जन हित सहलासा ॥
 तहँ ते हरनिहार सब दोसा । गंगा रहै अठारह कोसा ॥
 जब कछु वृद्ध भये जयदेऊ । तब श्रम होन लग्यो बहुतेऊ ॥
 सुरसरि तब सपने महँ भाष्यो । वृथा आप आवन अभिलाष्यो ॥

हमहीं तुव समीप महुँ ऐहैं । ताको अनुभव तुमहिं देखैहैं ॥
जब सर महुँ फूलै जलजाता । मम आगम जान्यो सति ताता
जब जयदेव जगे परभाता । लखे तड़ाग विपुल जलजाता ॥

दोहा—तबते तेहि सर महुँ नितै, लागे प्रात नहान ।

गंगा तेहि सर में बसी, यह आश्चर्य महान ॥ २१ ॥

सकल देशवासी जिते, जे जे मज्जन कीन ।

ते गंगा मज्जन फलै, पाय भये दुख क्षीन ॥ २२ ॥

ऐसे श्रीजयदेव के, जानहु चरित अपार ।

ताते कछु संक्षेप ते, भाष्यो मति अनुसार ॥ २३ ॥

इति श्रीरामरसिकावल्यांकलियुगखंडे उत्तरार्द्धे एकोत्रिंशोऽध्यायः २९

अथ श्रीधरस्वामीकी कथा ॥

दोहा—श्रीधर स्वामी को कहौं, यह अद्भुत इतिहास ।

जो श्रीमत्भागवत, कीन्ह्यो तिलक प्रकास ॥ १ ॥

श्रीधर ब्राह्मण कुल महुँ जाये । पंडित यदुपाति भक्त कहाये ॥

नाम कीर्तन में अति प्रीती । तैसेहि संत समाज प्रतीती ॥

एक समय करने रोजगारा । दूर देशलौं करि व्यापारा ॥

लै बहु द्रव्य चले घर काहीं । मिले तिनहिं ठग मारग माहीं ॥

श्रीधर सों पूछ्यो सब चोरा । को हौ भवन अहै केहि ठोरा ॥

श्रीधर ग्राम नाम कहि दीन्ह्यो । बहुरि प्रश्न चोरन सों कीन्ह्यो ॥

तुमहु कहहु कोहौ कहैं जाहू । ग्राम आपनो नाम बताहू ॥

चोरनहू भाष्यो सोइ ग्रामा । जहां रहै श्रीधर को धामा ॥

श्रीधर कह्यो साथ भल भयऊ । ठग कह तुव साथी कहैं गयऊ ॥

श्रीधर कह्यो राम है साथी । हम कहैं पावैं दल हय हाथी ॥

चोरन द्रव्यवंत तेहिं जानी । मारन हित उपाय निरमानी॥
पै श्रीधर जब नित पथ गहहीं । यह अश्लोक सदा मुख कहहीं॥

श्लोक—सन्नद्धः कवचीखड्गीचापबाणधरो युवा ।

गच्छन्मनोरथोस्माकंरामःपातुसलक्ष्मणः ।

आतसजनधनुषाविषुस्पृशावक्षयाशुगनिपंगसङ्गिनौ ।

रक्षणायममरामलक्ष्मणावग्रतःपथिसदैवगच्छताम् ॥

दोहा—जब जब श्रीधर को हतन, चोर समीपहि जायँ ।

तब तब राम लषण दोउ, धनु धरि तिनाहिं देखायँ ॥

यहि विधि चलत घर आये । मारग ठग नहिं मारन पाये ॥

तब श्रीधर ढिग चोर सिधारे । साम रीति सों वचन उचारे ॥

हैं बालक जे तुव सँग रहहीं । धनुष बाण रोजहि कर गहहीं॥

तिन को बोलि देहु देखराई । असि छवि अबलौं दृग नहिं आई

तब श्रीधर जान्यो सब हाला । वे दोऊ हैं दशरथ लाला ॥

चोरन सों कह ढारत आंशू । बालक कहै अवध महँ बाशू ॥

धन्य भागहै चोर तुम्हारी । दोउ बालक देखे धनुधारी ॥

अस कहि पकरचो चोरन चरणा । श्रीधर हर्ष जाय नहिं वरणा ॥

चोरनहू है गयो बिरागा । संत भये कीन्ह्यो जग त्यागा ॥

श्रीधर तजि संपति परिवारा । काशी वासी भयो उदारा ॥

यती भयो धारचो कर दंडा । रच्यो भागवत तिलक उदंडा॥

सकल शास्त्र संमत जेहि माहीं । वाद विवाद कल्पना नाहीं ॥

दोहा—काशिराज के भौन में, एक समय सविचार ॥

भइ समाज पंडितन की, जुरिगे टीकाकार ॥ २ ॥

काशिराज पूछ्यो यह टीका । कोको रच्यो भागवत टीका ॥

जे भागवत तिलक निरमाने । निज निज तिलक तुरंतहि आने

वामन तिलक जुरे तेहि काला । तब कोउ बोल्यो बुद्धि विशाला॥

श्रीधर तिलकतिलकतिलकनको। कठिनकठिनकोमलकोमलको
 पंडित सबै भाषि मन माहीं । कहत भये अब भूपति पाहीं ॥
 नृपति विंदुमाधव के मंदिर । तिलक धरौ सिंगरे अति सुंदर ॥
 जापै नाथ सही लिखि देहीं । तौन तिलक आदर करि लेहीं ॥
 यही भयो संमत सब केरो । भूपति हुकुम नगर महँ फेरो ॥
 निज निज तिलक सबै ले आये । माधव मंदिर माहँ धराये ॥
 श्रीधरहू को भूप बोलायो । हर्ष विषाद रहित सो आयो ॥
 तिलक जौन श्रीधर प्रभु कीन्ह्यो । सब तिलकन नीचे धारि दीन्ह्यो
 जुरे सकल काशी के वासी । तिलक तमासो देखन आसी ॥

दोहा—भूपति बंद केवार करि, लग्यो बजावन बाज ॥

रमा रमण धौं कौनकी, आज राखिहैं लाज ॥ ३ ॥

तब अकाश महँ बजे नगारे । परी सही अस सबै उचारे ॥
 खोलि किवार लख्यो जब जाई । तब यह कौतुक परचो देखाई ॥
 सकल तिलक ऊपर अति नीका । धरो रहै श्रीधरको टीका ॥
 आदि पत्र कनकाक्षर दोई । सही लिखी देखो सब कोई ॥
 तब भूपति श्रीधर कृत टीका । लियो लगाय दृगन अरु टीका ॥
 सब पंडित कीन्ह्यो अस टीको । श्रीधर टीको टीकन टीको ॥
 काशी में माच्यो जयकारा । राजा अरप्यो कनक हजार ॥
 श्रीधर तुरत बाँटि सब दीन्हे । आप एक मोहर नहिं लीन्हे ॥
 तबतें श्रीधर तिलक सुहावन । भयो सकल तिलकन ते पावन ॥
 बुधजन ताहि अवशि आदरहीं । और तिलक तेहि समनहिं करहीं
 जगमें श्रीधर तिलक प्रचारा । अबलों चलित सकल संसारा ॥

दोहा—यहि विधि श्रीधरकी कथा, जानहिं विविधि प्रकार ॥

मैं कहँलों वर्णन करों, मानि भीति विस्तार ॥ ४ ॥

॥ इति श्रीरामरसिकावल्योक्तलियुगखंडे उत्तरार्द्धे त्रिंशोऽध्यायः ३० ॥

अथ श्रीसूरदासकी कथा ॥

सोरठा—अब वंदौं श्रीसूर, भक्त शिरोमणि रसिक वर ॥

जासु काव्य रस पूर, विश्व भयो भावुक सकल ॥ १ ॥

कवित्त—प्रथम गृहस्थ गृह त्यागिकै विरक्त भयो, कृष्ण-
कृपापात्र ग्रंथ रच्यौ करुणामृतै ॥ ताको संत कीन्ह्यो हार फेरि
निजनैन फोरि, हरि हाथ गहि आये बृंदावन सुमतै ॥ चिंताम-
णि नाम गणिकाको उपदेश पाय, गोपिका की गति पायो सब
संत संमतै ॥ सूर सों भयोहै नाहिं द्वै है नाहिं दीसै अजौं ताके
पदकंज रघुराज नित न मतै ॥ १ ॥

दोहा—कृष्णावेना तीर में, नगर सोहावन एक ॥

विप्र विल्व मंगल तहाँ, वसत भयो सविवेक ॥ १ ॥

कोऊ द्विजगृह उत्सव भयऊ । विप्र विल्व मंगल तहाँ गयऊ ॥
तहाँ चिंतामणि गणिका आई । ताहि देखि मन गयो लोभाई ॥
गै गृह गान नृत्य करि आछे । चले विल्वमंगल तेहिं पाछे ॥
धन दै कीन्ह्यो तासु चिन्हारी । वसै रोज तेहिं भवन सुखारी ॥
भूल्यो विद्या धर्म अचारा । तज्यो कुटुम्ब लोक परिवारा ॥
आयो पितृपक्ष इक काला । श्राद्ध करनको कारज हाला ॥
तासों विदा मांगि घर आये । करी श्राद्ध बहु विप्र खवाये ॥
एक पहर बीती निशि जबहीं । भयो मनोज उदीपन तबहीं ॥
एकहि गणिका भवन सिधारा । तेहि घर रहै तरंगिनि पारा ॥
बाढी रहै नदी अति जोरा । पैरत भे करि जोर अथोरा ॥
मुरदा बह्यो जात इक रहेऊ । ताहि पकरि द्विज पारहिलहेऊ ॥

दोहा—काम विवश तेहिं मृतक को, जान्यो नाव सुजान ॥

ताहि विटप अरुझाय कै, तेहि घर कियो पयान ॥ २ ॥

तेहि घर लागि दुवार केवारे । गोहरायो नहिं खुले उवारे ॥

तब गृहके पछीत महुँ आये । झुलत रह्यो अहि भोग लगाये॥
 ताहि रज्जु गुनि गहि चढ़ि गयऊ। तेहि आँगन महुँ कूदत भयऊ॥
 फँसे तासु नरदा के पंका । तहुँके मानि चोरकी शंका ॥
 उठे सकल देखे द्रुतधाई । फँस्यो बिल्वमंगल दुख छाई
 तब तेहि ऐंचि पंक सब धोई । पूछ्यो गणिका युत सब कोई
 केहि मारग है तुम इत आये । तिन कहतै तो नाव पठाये ॥
 पुनि राखे इक रज्जु लगाई । तोहिसम मीत न मोहिं लखाई॥
 गणिका कह्यो नाव अरु डोरी । देहु देखाय मोरि मति भोरी ॥
 तब द्विज डोरी नाव देखायो । अहि अरु मृतक मानि भय पायो
 विप्र बिल्वमंगल बैठाई । चिंतामणि बोली अनषाई ॥
 तोहिं धिक् तोहिं धिक् तोहिं धिक् कामी । तोहिसम कौन विषम पथगामी

दोहा—जस यह मेरे चाममें, तुम दिय चित्त चुभाय ॥

तस जो लागत कृष्णमें, तो सिगरो बनिजाय ॥ २ ॥

कवित्त—जैसो मन मेरे हाड़ चाममें चुभायो मूढ़, तैसो यदि
 श्याम सों लगावतो सनेह सों । लोक परलोक जग ख्याति औ
 बड़ाई यश, तेरो बनिजातोरे तुरंत यही देह सों॥मैंतौ अहौं बारव
 धू उद्यय यहीहै नित, तदपि भजों मैं हरि चातक ज्यों मेह सों॥
 तूतो कुलवंतविप्र क्योंना भगवंत भजै वृथाही बिकानो पापी
 पातुरीके गेह सों ॥

दोहा—चिंतामणि गणिका वचन, लगे विप्र के वान ।

खुलिगे हिय पाटल पटल, उदित भानु भो ज्ञान ३॥

भक्तमालहू में कह्यो, यह कवित्त प्रियदास ।

औसर तासु विचारि कै, मैं इत करहुँ प्रकास ॥ ४ ॥

कवित्त—खुलि गई आँखें अभिलाषें रूप माधुरीको, चाखें
 रसरंग औ उमंग रस भारिये॥वीणलै बजाय गाय विपनि निकु

हाय २ तब सो द्विज गायो । नाथ प्रथम नहिं कस बतरायो
मम धन नारि भवन परिवारू । संत हेत नहिं और विचारू ॥
अस कहि बिल्वमंगलहि आनी । धोयो चरण आपने पानी ॥
सींच्यो सकल भवन सो नीरा । पुनि भोजन कराय दिय वीरा ॥
पुनि परयंक माहँ पौढ़ाई । अपनी तियको कह्यो बोलाई ॥
भूषण वसन पहिरि सब भांती । इनको सेवन कीजै राती ॥
अतिथि होत भगवंत सरूपा । इनहिं भजे न परै भवकूपा ॥

दोहा—पतिको शासन पाय तिय, भूषण वसन सवारि ।

द्विज आगे कर जोरि कै, ठाढ़ी भई सुखारि ॥ ७ ॥

विप्र निरखि तिय सुंदरताई । पुनि विचारि द्विज सज्जनताई ॥
अपनेको धिक् धिक् बहु कीन्ह्यो । पुनि सुंदरि सों अस कहि दीन्ह्यो
सूजी द्वै दीजै मन भाई । सो तुरंत सूजी दिय लाई ॥
गाढ्यो दोउ सूजी दोउ आंखी । तिय लखि हाय २ मुख भाखी ॥
यह प्रसंग प्रियदासहु भाष्यो । यक कवित्तके युग तुकराख्यो
कवित्त—कही युग सुई लाओ लाय दई लियो हाथे, फोरि-
डारी आंखी कह्यो बड़ी ये अभागीहैं । गई पतिपास श्वास भरत
न बोलि आवे, बोली दुख पाये आये पाय परे रागीहैं ॥ ८ ॥
दशा बिल्वमंगल की देखी । नारि गई पति पै दुख लेखी ॥
सुनत विप्र आयो द्रुत धाई । बोल्यो तिनसों आंशु बहाई ॥
कहा कियो यह तन की बाधा । हम सों भयो महा अपराधा ॥
साधुहि ल्याय भवन दुख दीन्ह्यो । तबै बिल्वमंगल कहि दीन्ह्यो ॥
तुमहौ साधु अहै हम नहिं । औगुण रहित साधु कहवाही ॥
तहँ कवित्त यह कह प्रियदासा । समय विचारि करौं परकासा ॥

कवित्त—काम नहीं क्रोध नहीं लोभ अहंकार नहीं, माया नहीं
मोह नहीं मिथ्या नहीं वादहै । आशा नहीं तृष्णा नहीं ईर्ष्या न

दम्भ कछु, कपट कठोर नहीं इंद्रिनको स्वाद है ॥ निंदा नहीं झूठ नहीं वासना न भोग की है, हिंसा मद मान नहीं पाप ना प्रमाद है ॥ साधु साधु सबही कहत हरिदास कहा, येते गुण जामें नहीं ताको नाम साध है ।

दोहा—अहैं विकारी नैन मम, नारी नेह करंत ।

सुखी भये दृग विगत हम, जगत बीच विचरंत ॥८॥

विप्र अवशि जानौ तुमहुँ, जौन मनोरथ मोर ।

सो चलि पूरण करहिंगे, नागर नंदकिशोर ॥ ९ ॥

जे नयना तियमें लगे, हाड़ चाम रस पाय ।

ते नयनको फोरिये, जन्म २ दुख जाय ॥ १० ॥

नयनन सों संतन दरश, नहिं देख्यो मतिमंद ।

मोरपक्षसम अक्ष ते, नहिं दायक आनंद ॥ ११ ॥

धिकधिक धिक् पुनि धिक् तिन्हें, सफल विलोचन नाहिं

येकहि बार निहारि जे, युवति ओर लगि जाहिं ॥ १२ ॥

धिकधिक धिक् उन कविनको, जे कवि वरणें नारि ।

सब औगुनकी खानिहै, ज्ञान भक्तिकी हारि ॥ १३ ॥

कवित्त—मासुही की ग्रंथि कुच कंचन कलश कहै, मुख कहै

चंदसों जो कफहीको वरु है ॥ वैभुज कमलनाल

नाभि कूप कहै ताहि हाड़ही को खम्भ ताहि कहै

रम्भ तरुहै ॥ हाड़के दशन ताहि कुंदके कलीसों

कहै, चामके अधर ताहि कहै बिबाफरु है ॥ ऐसी

झूठी युगुति बनावै औ कहावै कवि, तापर कहत

हमैं शारदा को वरुहै ॥ ५ ॥

दोहा—यहि विधि कहि बहु विधि वचन, मांगि विदा द्विजपास

सूरदास देखन चले, वृंदाविपिनि विलास ॥ १४ ॥

टोहत गये सूर कछु दूरी । यक थल बैठि गये श्रम भूरी ॥
 तेहि क्षणमें गजको उधरैया । टुपदसुताको चीर बढैया ॥
 भरुहीके अंडन बचवैया । निज दासनको रक्ष करैया ॥
 ऐसो श्रीदेवकी दुलारो । सूरदासके निकट सिधारो ॥
 पृछत भये सूर कहँ जाहू । सूर कह्यो वृज लखन उछाहू ॥
 हरि कह नयन हीन विन साथी । किमि पहुँचौगे विषय प्रमाथी ॥
 सूर कह्यो जसुधाको प्यारा । सोइ साथी है एक हमारा ॥
 तब हरि हाथ पकरि कह वानी । होत सांझ लीजै अस जानी ॥
 आगे चलौ बसौ यक बागा । भोर भये व्रज जाहु सुभागा ॥
 अस कहि यदुपति हाथ धराये । सूरदासको वागहि लाये ॥
 निज हाथन जलपान कराये । तब गहि हाथ सूर अस गाये ॥
 ये करकंज कृष्ण कस लागे । अस सुनि हरि छोड़ाय कर भागे ॥
 सूर कह्यो तब ऊंच पुकारी । सुनहु वचन मम कुंजविहारी ॥

दोहा—हाथ छोड़ाये जातहौ, निबल जानिकै मोहिं ॥

जब हिरदै ते छूटिहौ, मर्द बढौं गो तोहिं ॥ १५ ॥

अस कहि राति प्रयंत तहँ, सूरदास बसि बाग ॥

जागतही पहुँचे तुरत, वृंदावन बड़भाग ॥ १६ ॥

सेवा कुंज सिधारि कै, बैठे तरु तर जाय ॥

कीन्ह्यो मनसंकल्प अस, विन देखे यदुराय ॥ १७ ॥

नहिं उठिहौं नहिं डोलिहौं, नहिं करिहौं जलपान ॥

भजन करन लागे तहां, सूरदास मतिवान ॥ १८ ॥

कवित्त—भई उतकंठा भारी आये श्रीविहारीलाल, मुरली
 बजायकै सो कीन्ह्यो पुर आसहै । खुलिये नैन ज्यों कमल
 रवि उदै भये, देखि रूप रासिबाढ़ी कोटि गुनी प्यासहै ॥ मुरली
 मधुर सुर राख्यो मुदभरि मानो टरि आये आननतें काननमें

भासहै ॥ कमला निवासको यों वदन विलास देखि, आस निज
पूरमान्यो धन्य सूरदासहै ॥ १ ॥

दोहा—सूरदास सों पुनि कह्यो, नागर नंदकिशोर ॥

दूध भात भोजन करहु, तुम परसादी मोर ॥ १९ ॥

रोजहिं हम पठवै हैं दोना । ब्रजमें दोन पत्र बहु होना ॥
अस कहि भे हरि अंतर्ध्याना । सूरदास भे भक्त प्रधाना ॥
सूर सरिस कोउ दूसर नाही । जो पकरयो हरि निजकर माहीं
ब्रजमंडल महँ विचरन लागे । गावत कृष्ण चरित अति रागे ॥
एक दिवस यक मंदिर आये । रामरूप तेहि अतिहि सोहाये ॥
सूरदास जब वंदन कीन्ह्यो । तब कोउ साधु तर्क कहि दीन्ह्यो ॥
तुमतो कृष्ण उपासक अहहू । राम दरश काहेको करहू ॥
सूर कह्यो तब वचन प्रमानै । रामकृष्ण एकहि हम जानै ॥
साधु कह्यो एकहि है नाही । ऐसो कहौ न तुम मुख माहीं ॥
हैं कृष्ण कबहुँ नहिं रामा । राम होयँगे नहिं क्षण इयामा ॥
वैतौ दशरथ भूप किशोरा । ये तो नंदमहरके छोरा ॥
सूर कह्यो कछु अचरज नाही । राम होयँगे कृष्ण सदार्हा ॥

दोहा—अस कहिकै कर जोरि कै, सन्मुख ठाढ़े सूर ॥

यह कवित्त भाषत भये, आनंद रस महँ पूरा ॥ २० ॥

कवित्त—राखौ धनु बाण गहि मुरली बजाओ तान, राखो
पटपीत चखचपल निहारिये ॥ राखो वनमाल उर अंगही त्रिभंग
करौ, शीश मोरमुकुट कर लकुटी विचारिये ॥ राखौ जानकी कि
शोरराधिका देखाओ ओर राखौ राज पाट गावँ चोरीको सि-
धारिये औधचंद होहु नंदनंदन अब हेतु मेरे साधुको हमारे या
विवाद निवारिये ॥

सोरठा—सूर विनय सुनि राम, मोर मुकुट लकुटी गह्यो । ॥

सँग राधावर वाम, अधर मुरलि धारण कियो ॥ २१ ॥
 यह कौतुक लखि साधु समाजा । सूरहि मानि साधु शिरताजा ॥
 धरे सूर पदरेणु माथमें । जय जय कीन्ह्यो एक साथमें ॥
 चिंतामणि गणिका रहि जोई । ब्रजको आय गई पुनि सोई ॥
 सुन्यो सूरके चरित अपारा । दर्शन हेतु तहां पगुधारा ॥
 सूरदास ताको पहिचानी । आगे ते चलिकैं सनमानी ॥
 ताहि वंदि आसन बैठाई । बोले वचन ताहि शिरनाई ॥
 तव उपदेश मोद मैं पायो । तैं तौ सर्वस मोर बनायो ॥
 सूर आपनी कथा सुनाई । जेहि विधि दर्श दियो यदुराई ॥
 कथा कहत मैं आयो दोना । दूध भातको अतिशय सोना ॥
 कह्यो सूर तब सहित सनेहू । आजु प्रसादी तुमहीं लेहू ॥
 चिंतामणि बोली तब बाता । यह दोना काकरहै ताता ॥
 सूर सकल वृत्तांत सुनायो । चिंतामणि तब अस मुख गायो ॥

दोहा—कहा तुमहि भर भक्त हो, मोहिं न जानत नाथ ।

दोना दूसर लेहुंगी, जब देहैं यदुनाथ ॥ २२ ॥

अस कहि वीन बजायकै, गावन लगी पुकारि ।

तदाकार हरिमैं भई, तुरत द्वारकी नारि ॥ २३ ॥

ताकी प्रीति परेखिकै, प्रगटे ताही ठोर ।

दोऊ कर दोना लिये, नागर नंदकिशोर ॥ २४ ॥

चिंतामणिको एक दै, दूसर सूरहिं दीन ।

चिंतामणिको सूरको, हरि अपनो करि लीन ॥ २५ ॥

कवित्त—कविकुल कोककंज पायकै किरिनि काव्य, विकसे
 विनोदित है बेर और दूरके ॥ सुखिगो अज्ञान पंक मंद भो
 मयंक मोह, विषय विकार अंधकार मिटे कूरके ॥ हरिकी

विमुखताई रजनी पराय गई सूक भये कुकवि उलूक रस झूरके॥
छायो तेज प्रेम पुहुमीमें रघुराज नूर, हरिजन जीव मूर उदै
सूर सूरके ॥ १ ॥

इति श्रीरामरसिकावल्यांकलियुगखंडेउत्तरार्द्धेएकत्रिंशोऽध्यायः ३१ ॥

अथ ज्ञानदेवकी कथा ॥

दोहा—ज्ञानदेव आख्यान अब, करहुँ प्रमाण बखान ।

ज्ञान दीप दीपत सुनत, श्रोता सुनहु सुजान ॥ १ ॥

कोउ ब्राह्मण यक भक्त सुजाना । गृह तजि काशी कियो पयाना
मिले जाय संन्यासी काही । कह्यो कुटुंब हमारे नाहीं ॥
संन्यासी कीन्ह्यो संन्यासी । बसे कछुक दिन मोदित कासी ॥
तेहि तिय सों कोउ अस कहि दयऊ । तेरो पति संन्यासी भयऊ ॥
नारि सुनत काशीको आई । कियो पुकार राजघर जाई ॥
राजा कह्यो जो तुव पति होई । लैजा घर वरजै नहिं कोई ॥
तिय निजपति लै निजघर आई । तेहि सँग पुत्र तीनि जनमाई ॥
जाति पांतिके सब तेहिं त्यागे । बसत भयो निजघर दुख पागे ॥
तिनमें जेठ पुत्र जो जायो । ज्ञानदेव सो नामहिं पायो ॥
भयो अनन्य भक्त हरि केरो । सकल विश्व भगवतमय हेरो ॥
जो अनन्य जग हरिमय देखत । उत्तम भक्त ताहि बुध लेखत ॥
तुलसी कृत रामायण माहीं । लिख्यो गोसांई दोहा काहीं ॥

दोहा—सो अनन्य असि जाहिकै, मति न टरै हनुमंत ।

मैं सेवक सचराचर, रूप राशि भगवंत ॥ १ ॥

ऐसे ज्ञानदेव जब भयऊ । हरिते भिन्न न कछु लखि लयऊ ॥
यक दिन गे यक पंडित भवनै । कीन्ह्यो विनय ध्याय श्रीरामनै ॥
देहु हमहुँको वेद पढ़ाई । तब पंडित बोल्यो मुसकाई ॥
तेरो नहीं वेद अधिकारा । छांड़ि दियो तोको परिवारा ॥

ज्ञानदेव तब मन विलखाई । दूसर पंडित निकट सिधाई ॥
 वेद पढ़नको विनती कीन्हा । सोऊ उत्तर तेहिं विधि दीन्हा ॥
 तब आये घर मानि विषादा । कैसी वेद पढ़न मरयादा ॥
 एक समय नृपभवन मंझारा । लाग रहै पंडित दरबारा ॥
 ज्ञानदेवहुं तहां सिधाई । राजासों असि विनय सुनाई ॥
 सब वैदिकन विनय हम कीन्हो । वेद पढ़नको अति मन दीन्हो ॥
 पै पंडित नहिं वेद पढ़ाये । भूप तुम्है फिरि याचन आये ॥
 राजा कह्यो वैदिकन पाहीं । काहे वेद पढ़ावत नाहीं ॥

दोहा—तब वैदिक बोले सकल, यहिं त्याग्यो परिवार ॥

वेद पढ़नको अब नहीं, याको है अधिकार ॥ २ ॥

तब यक महिष बँध्यो तेहि ठोरा । ज्ञानदेव कह लखि तेहि ओरा ॥
 सुनहु सकल यहि भैंसाकाहीं । श्रुति अधिकार अहै की नाहीं ॥
 पंडित कह्यो न है अधिकारा । जस भैंसा कर तथा तुम्हारा ॥
 ज्ञानदेव कह होवै कैसा । वेद पढ़ै जो निज मुख भैंसा ॥
 साभिमान पंडित तब गायो । जो यह भैंसा वेद सुनायो ॥
 तो तुमको हम वेद पढ़ैहैं । फेरि न कछु संदेह सुनैहैं ॥
 तब उठि ज्ञानदेव हरषाई । भैंसा निकट ठाढ़मे जाई ॥
 बोले वचन सुमिरि भगवंता । जो हरि पंडित हृदय वसंता ॥
 भैंसा महुँ होवै हरि सोई । पढ़ै वेद संशय नहिं कोई ॥
 पढ़न लग्यो भैंसा तब वेदा । पदक्रम जटाक्रमहु विन खेदा ॥
 सकल सभा अचरज ह्वैगयऊ । वैदिकवृंद मानहत भयऊ ॥
 भूपति अरु पंडित समुदाई । ज्ञानदेव पद पकरे जाई ॥

दोहा—जयजयकार कियो सबै, ज्ञानदेव गुरु मानि ॥

सकल वेद पुस्तक दियो, गृहते द्रुत तोहिं आनि ॥ ३ ॥

इति श्रीरामरसिकावल्यांकलियुगखंडेउत्तरार्द्धेद्वात्रिंशोऽध्यायः ॥ ३२ ॥

अथ वल्लभाचार्यकी कथा ॥

दोहा—कहाँ वल्लभाचार्यको, अब सुंदर इतिहास ॥

जाहि सुनत यदुनाथमें, होत अवशि विश्वास ॥ १ ॥

भये वल्लभाचार्य विरागी । वृंदाविपिन गये अनुरागी ॥

गोकुलगावँ वसे सुखरासी । राधा माधव चरण उपासी ॥

एक समय गोवर्द्धन आये । राधाकुंड वसे सुखछाये ॥

एक विप्र कन्या लै आयो । सुता लेहु वल्लभसों गायो ॥

वल्लभ बहुत भांति तेहि वाच्यो । सो हठ पच्यो न नेकु विचाच्यो ॥

कह्यो सपन महँ तब प्रभु आई । लेहु सुता शासन मम पाई ॥

वल्लभ कियो त्यागि जो आयो । पुनि तामें तू चहत फँसायो ॥

जो याके तुमही सुत होऊ । तौ स्वीकार करब हम सोऊ ॥

हरि कह व्हैहँ सुत हम आई । कन्या ग्रहण करौ मन भाई ॥

वल्लभ जागि भोर दुहिताको । ग्रहण कियो विवाहविधि ताको ॥

कछुक काल महँ विप्रकुमारी । गर्भवती भै अतिछवि वारी ॥

तबै वल्लभाचार्य सुजाना । तीर्थाटन हित कियो पयाना ॥

दोहा—तियहु चली संगमें तुरत, मान्यो वारण नाहि ॥

पति आगे पाछे तिया, मौन चले पथ जाहि ॥ १ ॥

कछुक दूरि महँ बालक भयऊ । वल्लभ तेहि तनु कछुक न लखेऊ ॥

नहिं टेच्यो तिय मन यह भीती । तिय शासन पतिको नहिं रीती ॥

तब एक वृक्ष तरे धरि बालक । आप चली सुमिरत यदुपालक ॥

तीर्थ करत बीते युत हर्षा । दम्पतिको तहँ द्वादशवर्षा ॥

बहुरि वल्लभाचार्य सनारी । आये तेहि पथ ब्रजहिं सिधारी ॥

सोइ बालक तेहि तरु तर माहीं । पच्यो रहै कौतुक दरशाहीं ॥

किये सर्प तेहि ऊपर छाया । चहुँ दिशि रक्षत मृग समुदाया ॥

पूछ्यो वल्लभ तब तेहिं काहीं । बालक काको परा यहांहीं ॥

तिय कह बालक आपहि केरो । याको करो विशेष निवेरो ॥
 वल्लभ कह्यो जाहु ढिग प्यारी । श्रवै पयोधर जो पय भारी ॥
 तौ बालक सांचोहैं तेरा । ऐसो याको करौ निवेरा ॥
 तुरत बाल ढिग नारि सिधारी । श्रयो पयोधर ते पय भारी ॥

दोहा—गे मृगवृंद विलाय सब, गो अहि भूमि समाय ।

तब तुरंत शिशुको तिया, लीन्ह्यो कंठ लगाय ॥ २॥
 विठ्ठलदास धरचो तेहि नामा । तासु सुयश पूरित सबधामा ॥
 चरित वल्लभाचार्य अपारा । कहै को जेहि हरि भये कुमारा ॥
 यह प्रसंग जानहु श्रोता धुर । सुनहु चरित्र और तिनके फुरा ॥
 एक दिवस वल्लभाचार्य गृह । आयो एक साधु दर्शन कहा ॥
 एक वृक्षकी शाखा माहीं । ठाकुर बटुवा बांधि तहाँहीं ॥
 करिकै दर्श बहुरि जब देख्यो । ठाकुर रहै न तहँ दुख लेख्यो ॥
 कह्यो वल्लभाचार्यहि आई । ठाकुर मम कोउ लियो चोराई ॥
 कह्यो वल्लभाचार्य विशेषी । ठाकुर तहँ लेहु निज देखी ॥
 जाय लेख्यो पुनि पादप शाखा । बटुवा बहुत बांधि कोउ राखा ॥
 तब भ्रम भयो बहुरि पुनि आयो । वृत्तवल्लभाचार्यहि गायो ॥
 कह्यो वल्लभाचार्य बहोरी । चीन्हि लेहु बटुवा निज छोरी ॥
 पुनि शाखा समीप द्विज गयऊ । निज बटुवै भारि देखत भयऊ ॥

दोहा—लै ठाकुर अति मुदित है, वल्लभ निकट सिधारि ॥

चरण परशि परणाम किय, जैजै वचन उचारि ॥ ३॥

चरित वल्लभाचार्यके, यहि विधि जानहु भूरि ॥

रसिक जनन संतन चरित, जगमें जीवन मूरि ॥ ४॥

इति श्रीरामरसिकावल्यांकलियुगखंडे उत्तरार्द्धे त्रयस्त्रिंशोऽध्यायः ३३ ॥

अथ शंकराचार्यकी कथा ॥

दोहा-कथाशंकराचार्यकी, कथत अहाँ यहि काल ॥

सुनिये श्रोता चित्तदै, हरत सकल भ्रमजाल ॥ १ ॥

शंकर सत्य शम्भु अवतारा । कियो जगतमें धर्म प्रचारा ॥
बढ़े जैन धर्मी जग माहीं । लोपे शास्त्र पुराणन काहीं ॥
दियो भागवत अम्बुडुवाई । भै अवनी अधर्म अधिकाई ॥
श्रीभागवत सकल असकंधा । वोप देवके कंठ प्रबंधा ॥
अमरसिंह सेवरा अयाना । सो जैनन में रह्यो प्रधाना ॥
विदित विश्व इत शंकर भयऊ । पूर्व धर्म थापन हित गयऊ ॥
अमरसिंहसों भयो विवादा । करें हजारन जैन कुवादा ॥
कहँलगे शंकर सुवन बुझावैं । हारैं बहुत बहुत पुनि आवैं ॥
शिष्यन शंकर तुरत बोलाई । दीन्ह्यो अस इकांत समुझाई ॥
यहि पुरको नृप जब मरि जैहैं । तब मम जीव तासु तनु जैहैं ॥
धरचो मोर तनु जतन कराई । जो पुनि होय विलंब महाही ॥
तौ सुनाइये यह श्लोका । तब मिट जैहै सिंगरो शोका ॥

दोहा-अस कहि तहँ निवसत भये, कुछ दिन महँ महिपाला ॥

मरत भयो तब तनु प्रविशि, उठि बैठे तत्काल ॥ २ ॥

ग्रंथ मोहमुदगल इकनामा । रानी पढ़े रहै छविधामा ॥
तासों पढ़िकै सिंगरो ग्रंथा । तौन देश प्रगटचो सदपंथा ॥
दीन्ह्यो जैनिन देशनिकारी । प्रगटायो वरभक्ति खरारी ॥
शिष्यन जानि विलम्ब महाई । नृपहि जाय श्लोक सुनाई ॥
तब पुनि निज शरीर महँ आये । काशी गवन कियो सुख छाये ॥
रह्यो काशि पति जैनिन चेला । एक समय पारंगो तेहि मेला ॥
उपर अटा पर बैठचो राजा । सहित जैन दश सहस समाजा ॥
कीन्ह्यो शंकर स्वामी माया । गंगाजल तुरंत अधिकाया ॥

अँटाप्रयंत पहुँचि जल गयऊ । जाने सकल मरन अब भयऊ॥
 प्रगटी तबै दराज जहाजा । तापर चढ़न लग्यो जब राजा॥
 तब शंकर बोले असिवानी । प्रथम चढ़ावहु निज गुरुज्ञानी॥
 बचाय बचावहु जीवा । नातो नरक होय दुख सीवा ॥
 भूपति अस दियो निदेशा । चहैं गुरू सब विगत कलेशा ॥
 दोहा—दश हजार तब जैन जन, नौका चढ़े तुरंत ।

बूढ़िगई तब नाव जल, भयो सबनको अंत ॥ ३ ॥
 तब राजहि शंकर शिष्य कीन्ह्यो।करि उपदेश भक्त करि दीन्ह्यो॥
 वेद पुराण शास्त्र जगमार्हीं । जसकेतस थापे सबकार्हीं ॥
 प्रगटी हरिकी भक्ति महाई । यमके पुरको जन नहिं जाई ॥
 तब यम जाय नाथ फिरियादा । किय शंकर सतयुग मरयादा॥
 तब शंकरहि कियो प्रभु शासन । विमुख करो जीवनके ब्रातन ॥
 नातो नरक झूठ है जाई । तब शंकर दीन्ह्यो अस गाई ॥
 मानहु ब्रह्मजीव कहएका । अहै न माया जीव अनेका ॥
 मानन लगे ब्रह्म जिय कार्हीं । सोहं रटन मची चहुँ वार्हीं ॥
 भे हरिविमुख मिथ्यो अनुरागा । तर्कपंथ पुनिकै बहु जागा ॥
 शंकर चलि बदरीवन मार्हीं । ब्रह्मरंध्र त्याग्यो तनु कार्हीं ॥
 कीन्ह्यो हरिनिवास महँ वासा । ऐसी शंकर कथा प्रकासा ॥
 कहँलौं करौं तासु गुणगाना । विस्तर भीति ग्रंथ मन जाना॥

दोहा—पुनि जब रामानुज भये, तबपाखंडिन खंडि ।

श्रीसंप्रदाचलायकै, दियो भक्तिरस मंडि ॥ ४ ॥

इति श्रीरामरसिकावल्यांकलियुगखंडे उत्तरार्द्धचतुस्त्रिंशोऽध्यायः३४॥

अथ कोईएकभक्तकी कथा ॥

दोहा—अब वरणौं इक भक्तको, नाम न जानहुँ तास ।

सुन्यो पिता मुखते कथा, सो अब करहुँ प्रकास ॥१॥

रह्यो कोउ ब्रजमें हरिदासा । हरि अनुरागी जगत निरासा ॥
 परमहंस विचरत ब्रज माहीं । सीला बीनि बीनि सुख खाहीं ॥
 लागी सुरति रहति हरिचरणा । देखत जगत झ्यामई वरणा ॥
 ताहि देखि नारद इक काला । जाय कह्यो सुनि दीनदयाला ॥
 तोर भक्त जगमहँ अति रंका । ताकी होति तोहिं नहिं शंका ॥
 प्रभु कह यदपि देहुँतिन काहीं । काह करौं लेते कछु नाहीं ॥
 नारद कह्यो देहु तुम जोई । कस नहिं ग्रहण करहिं हठि सोई ॥
 प्रभु कह चलहु संग ममलागी । देहौं सोइ जौन वह मांगी ॥
 अस कहि प्रभु नारद दोउआये । सोइ भक्तके निकट सोहाये ॥
 हरि पीतांबर दियो ओढ़ाई । कह्यो मांगु जो तुव मनभाई ॥
 तब वह यदुपति भक्त सुजाना । प्रभुहिं विलोकि नेकु मुसकाना ॥
 अंबक बहति अम्बुकी धारा । मंद मंद अस वचन उचारा ॥
 लाला हमको तुम नहिं देहौ । मांगव मोर सुनत नटिजैहौ ॥

दोहा—प्रभुकह भुवन विभूतिहूँ, जो माँगै यहिवार ।

सो देहौं संशय नहीं, मृषा न वचन हमार ॥ १ ॥

कह्यो भक्त तब मंजुल वाणी । होति न मोहिं प्रतीति प्रमाणा ॥
 लाला तीनिवार कहि देहू । मोरमनोरथ तौ सुनिलेहू ॥
 तब हरि विहँसत वचन उचारे । माँगहु माँगहु माँगहु प्यारे ॥
 तब हरिभक्त कह्यो मुसकाई । सुनहु नंदनंदन सुखदाई ॥
 ऐसे झगरेमें मति परिये । सुखी आपने मंदिर रहिये ॥
 यही देहु मोको वरदाना । हैनहिं हिये मनोरथ आना ॥
 कोमल पद कंटक महिमाहीं । बारबार विचरहु तुम नाहीं ॥
 सीकै कांटन चिरकुट भूरी । करैं शीत आतप हम दूरी ॥
 बीनि शिला भरि उदर अघाई । तुमको नित देखव थदुराई ॥
 याते अधिक कौन सुख होई । मम सम इंद्र विरंचि न कोई ॥

तब हरि विहँसि कह्यो ऋषि पाहीं। देखहु दिहेहु लेत कछु नाहीं ॥
 नारद करि परदक्षिण ताको । प्रेमानंद मगन सुख छाको ॥
 दोहा—ताहि प्रशंसत बार बहु, पुनि पुनि करि परणाम ॥
 गवन कियो हरि संग में, गावत हरिगुण ग्राम ॥ २ ॥
 इति श्रीरामरसिकावल्यांकलियुगखंडेउत्तरार्द्धेपंचत्रिंशोऽध्यायः ॥ ३५ ॥

अथ सिंहकिशोरकी कथा ॥

दोहा—मिथिला को राजा रह्यो, सिंहकिशोर सुनाम ॥
 ताके गर्व महा रह्यो, मोर जमाई राम ॥ १ ॥
 बैठे सभा मध्य जब राजा । ताहि कहैं पंडितन समाजा ॥
 चलहु अवधपुर प्रभु इक बारा। पावहिं सबै अनंद अपारा ॥
 तब राजा भाषै सब पाहीं । विना बोलाये नात न जाहीं ॥
 जब रघुवंशी हमहिं बोलै हैं । तब कोशलपुर हमहुँ सिधैं हैं ॥
 यहि विधि बीतिगयो बहु काल। कोउ पंडित कह बुद्धि विशाल ॥
 चलहु विदेह अवधपुर काहीं । तुम्हरे संग हमहुँ सब जाहीं ॥
 तबहिं किशोरसिंह नरनाहा । अवध गवन करि कियो उछाहा ॥
 साजि समाज राज परिवारा । चलयो दुंदुभी देत धुकारा ॥
 रहिगो अवध कोश जब पांचा। डेरा कियो भावको सांचा ॥
 कहैं सबै जब चलिय भुवाला । तब ऐसो भाषत तेहि काला ॥
 नात बोलाये विना न जाहीं । आयो कोऊ लेन मोहिं नाहीं ॥
 एक समय भूपतिके डेरा । सभा सदन सबको अस टेरा ॥
 दोहा—महाराज कोशल अधिप, मंत्री तासु सुमंत ॥
 मोहिं आनन आवत भयो, ताको तनय तुरंत ॥ १ ॥
 अस कहि दै मिथिलेश नगारा। चलयो अवधपुर शहरमँझारा ॥
 मंदिर एक उत्तंग अनूपा । किय निवास मिथिलापतिभूषा ॥

दरशन हेतु कहूं नहिं जाहीं । बैठरहैं निज मंदिर माहीं ॥
चलहु दरश हित अस सब कहहीं । तब मैथिल गुमान मन गहहीं
कहै सबैसो केहि विधि जाहीं । कोउ रघुवंशी आये नाहीं ॥
भूप चक्रवर्ती महाराजा । अथवा तिन सुत सहित समाजा ॥
ऐहैं प्रथम हमारे डेरा । करिहैं जव सत्कार घनेरा ॥
तब हम चलव तासु घर माहीं । विन सत्कार नात गृह जाहीं ॥
कबते भै रघुवंश बड़ाई । जाते रहे महामद छाई ॥
रघुवंशिनते छोट न अहहीं । मांगन हेतु इतै नहिं रहहीं ॥
जो हमरो करिहैं सन्माना । तौ हम इनके जाव मकाना ॥
सत्वभाव कीन्हे मिथिलेशा । बिते पांच दिन बैठि निदेशा ॥

दोहा—पंचम दिन मिथिलेशकी, भई भावना सत्य ॥

बोलि उठ्यो निजते तहाँ, सुनहु सबै मम भृत्य ॥ २ ॥

दशरथ नृपके चारि कुमारे । आवत डेरा आजु हमारे ॥
करहु तयारी विलम न आनी । सब विधि नातनको सन्मानी ॥
अस कहि लंब फरश बिछवायो । चारु चांदनी तहाँ तनायो ॥
गद्दी चारु चारि लगवायो । पचई तेहि ढिग निज धरवायो ॥
अतर गुलाबहु पान मसाला । धरयो हेम भाजन ततकाला ॥
बैठि सभासद सकल समाना । ठाढ़े भये नकीव सुजाना ॥
कछुक काल महँ कह्यो भुवाला । आवत चारिहु दशरथ लाला
राजा उठि ब्योढ़ीतक आयो । रामरूप तेहि प्रगट दिखायो ॥
चारिहु बंधु उतारि यान ते । पूछि कुशल आनंद महानते ॥
ल्यायो भीतर शिविर तुरंता । बैठायो आसन सिय कंता ॥
बैठ यथावत चारिहु भ्राता । तैसहि सब रघुवंश जमाता ॥
आप तुरत उठि अतर लगायो । चारिहु बंधुन पान खवायो ॥

दोहा—सुरभि सलिल सींच्यो सबन, कीन्ह्यो अति सत्कार॥

कुशल प्रश्न पूछत भयो, बहनो इन बहु बार ॥ ३ ॥
चारि बंधु हित सबन अनूपा । लयायो जो मिथिलाते भूपा ॥
सो चारिउ भ्रातन को दीन्ह्यो । बहु सत्कार सखनको कीन्ह्यो॥
कछुक काल लगि भै दरबाराद्वितिय न कोउ यह चरित निहारा
बंधुन सहित उठे तब रामा । गये शयन युत अपनेधामा ॥
कछुक दूरि लगि नृप पहुँचायो । लौटि फेरि डेरै निज आयो ॥
दुसरे दिवस साजि निज सैना । कनक भवन गवन्यो भरिनैना॥
कोहूको नहिं कछू देखाये । ताहिलेन रघुपति कटि आये ॥
गहि रघुनाथ हाथ गृह लाये । निजसमान आसन बैठाये ॥
बैठे तहँ दशरथ महाराजा । भाइन भृत्यन सहित समाजा ॥
अतर पान निज करप्रभुदीन्ह्यो । पुनिसत्कारविवि विधि कीन्ह्यो ॥
कुशल प्रश्न कीन्ह्यो महाराजा । आप कृपा कह मैथिल राजा ॥
राज्यो बहुत बार दरबारा । चलत हासरस विविध प्रकारा ॥

दोहा—सबते अति सत्कार लहि, उठि तिरहुतको भूप ॥

भगिनि भेट हित गवन किय, अंतहपुरहि अनूप ॥ ४ ॥
गयो पवारि जब मैथिल राई । तीनिहु भगिनि सहित सिय आई ॥
पारि पद रुदन करत तेहिं भेट्यो । कहि मृदुवचन भ्रात दुख भेट्यो
मणि मंदिर सिय गई लेवाई । पूछी नैहरकी कुशलाई ॥
भगिनि दैन हित जो लैगयऊ । यथा योग्य मिथिलाधिपदयऊ
कौशल्यादिक जे सब रानी । मिथिलाधिपहि बहुत सन्मानी ॥
पुनि उठि भूपति बाहेर आयो । चढ़ि वाहन निज सदन सिधायो
रहेजे मिथिलाधिप संगमाही । ते चरित्र देखे कोउ नाहीं ॥
जबलों रह्यो अवधपुर राजा । मुद्रादिय जल पीवन काजा ॥
कूच कौशलपुर तेरे । मिथिला गयो डरावत डेरे ॥

जबलों रह्यो विदेह शरीरा । तबलगि तस देख्यो मतिधीरा ॥
सजन और जे राम मिलापी । ते जाने तेहि परम प्रतापी ॥
ते ताके सँग किये पयाना । तिनको तैसहि सत्य देखाना ॥

दोहा—यह चरित्र यहि कालते, शतसंवतके बीच ।

रामकृपा जापर भई, कौन ऊँच को नीच ॥ ५ ॥

इति श्रीरामरसिकावल्यांकलियुगखंडे उत्तरार्द्धे षट्त्रिंशोऽध्यायः ॥ ३६ ॥

अथ पुरुषोत्तमक्षेत्रके राजाकी कथा ॥

दोहा—श्रीपुरुषोत्तम क्षेत्रको, राजा भक्त प्रधान ।

तासु चरित वर्णन करौं, सुनहु सबै दैकान ॥

जगन्नाथ नगरीको राजा । बसै पुरी महँ सहित समाजा ॥
अबलों प्रगट तासु सब रीती । यात्री दर्शन करहिं सप्रीती ॥
एक समय आपने अवासा । खेलत रह्यो भूमिपति पासा ॥
जगन्नाथ पंडा तेहि काला । लाये नाथ प्रसाद उताला ॥
दक्षिण कर पांसा इत रहेऊ । बाँयेहाथ प्रसाद गहेऊ ॥
तब पंडा नहिं दियो प्रसादा । लैप्रसाद फिरिगे सविषादा ॥
मन महँ सबै विचारन लागे । राजा नहिं प्रसाद अनुरागे ॥
चौपरि खेलि उठ्यो नरनाहा । अति गलानि कीन्ही मनमाहा ॥
आयो हाथ नाथ परसादा । लीन्ह्यो मैं न सहित मर्यादा ॥
वाम पाणितेहि गहन पसारयो । पासा क्षुद्र दाहिन कर धारयो ॥
तादिन भूपति अशन न कीना । मानिगलानि महादुख भीना ॥
भोर भये पंडितन बोलायो । तिनते ऐसो वचन सुनायो ॥

दोहा—श्रीजगदीश प्रसादको, करै जो कोउ अपमान ।

तासु कौन उपचारहै, साँचो करहु बखान ॥ १ ॥

सब पंडित संमत करि भाखे । वेद पुराण रीति अस राखे ॥

जोन अंगते हो आपमाना । ताको छेदन करै सुजाना ॥
 तब नृप गुन्यो भूप परि पाटी । को अस जो हमार कर काटी ॥
 ताते अस मैं करहुँ उपाऊ । जाते मैं अधर्म फल पाऊँ ॥
 दिवस द्वैक महँ सो नृप राई । परचो पर्यंकहि नकल बनाई ॥
 पूछ्यो आय सचिव प्रभु कैसो । नृप कह इक डर होत अनैसो ॥
 शयन करहुँ जब मैं अधराता । आवत एक प्रेत भयदाता ॥
 डारि झरोखाते कर कूरा । मोको देत महाभय पूरा ॥
 कह्यो सचिव नृप सोच न कीजै । अपने पास मोहिं निशि लीजै ॥
 जबहिं झरोखा ते कर डारी । डरिहों मारि काटि तरवारी ॥
 अस कहि सचिव भूपके पासा । निवस्यो निशा करन भय नासा ॥
 सचिव नींदवश कछु जब भयऊ । राजा तब तुरंत उठिगयऊ ॥

दोहा—सोइ झरोखाते नृपति, डारचो निज करवाम ॥

प्रेत सरिसरव करतभो, जग्यो सचिव तेहिं याम ॥२॥
 काटि कृपाणहन्यो कर माहीं । भये खंड द्वै हाथ तहाँहीं ॥
 मोदित सचिव दौरि तहँ आयो । राजाको लखि अति दुख पायो
 कह्यो कहा कीन्ह्यो प्रभु कर्मा । उभयलोक नाइयो मम धर्मा ॥
 राजा कह्यो रह्यो कर प्रेता । ताहि छोंडायो तैं शुभचेता ॥
 भगवत अपराधी कर मोरा । यामें दोष कछू नहिं तोरा ॥
 अस कहि भूपति आनँद मानी । निवस्यो सुमिरत सारँग पानी ॥
 पंडन उतै नाथ सपनायो । लैप्रसाद पंडा द्रुत धायो ॥
 लखि जगदीश प्रसाद भुवाला । युग पसारि कर उव्यो उताला ॥
 गहत प्रसाद हाथ जमि आयो । सकल पुरी जय जय ख छायो ॥
 सपनायो पंडन जगनाथा । देहु गाड़ि भूमहँ नृप हाथा ॥
 सो करलै पंडा क्षिति गाड़े । उपज्यो द्रुत तरु एक तेहिं डाड़े
 ताकर नाम भयो करदोना । तासु सुमन सुमिरत सुठिसोना

दोहा-सो जगदीशहि चढ़त नित, अबलों प्रगट प्रभाव ॥

ऐसे चरित अनेकहैं, कहलों करौ बड़ाव ॥ ३ ॥

इति श्रीरामरसिकावल्यांकलियुगखंडेउत्तरार्द्धसप्तत्रिंशोऽध्यायः ॥ ३७ ॥

अथ कर्माबाईकी कथा ॥

दोहा-कर्माबाई की कथा, अब वरणौं चितलाय ॥

अबलों जासु प्रभाव जग, सुनहु संत समुदाय ॥ १ ॥
रही जाति की तेलिनि कोई । पूर्व जन्म सेयो सत सोई ॥
सेवन संत प्रगट परभाऊ । बढ्यो तासु हरिपद महँ भाऊ ॥
सो जगदीश पुरी कहँ आई । रहै वित्तते हीन महाई ॥
मज्जन पूजन कछु नहिँ करही । भोरहि ते उठि अस अनुसरही ॥
यक दोहनि खीचरी बनावै । सो जगदीशै भोग लगावै ॥
सांचो प्रेम करै प्रभु माहीं । राति दिवस विसरै सुधि नाहीं ॥
सांचो भाव देखि तहँ ताको । प्रगटि तुरत कंत कमलाको ॥
सो खिचरी प्रत्यक्ष प्रभु पावै । बचो जौन प्रभु ताहि खवावै ॥
कर्माको मन निशिदिन लागा । होय प्रात कब अति सुखपागा ॥
कब मैं रचि खीचरी बनाऊँ । कब प्रभुको मैं भोग लगाऊँ ॥
राति दिवस यदुनाथ देखाहीं । और ताहि सूझे कछु नाहीं ॥
यहिविधि बीति गयो तेहि काला । खिचरी खाय तासु जगपाला ॥

दोहा-यहिमारग हूँ एक दिन, आचारी कोउ आय ॥

कढ़त भये देख्यो रचत, खिचरी विनानहाय ॥ १ ॥
बैठि गये तहँ कोपहि छाई । बोलत मे सुनु कर्माबाई ॥
क्या करती दोहनी चढ़ाई । कर्माबाई कह शिरनाई ॥
हरिके हित खीचरी बनाऊँ । रोजहि प्रभुको भोग लगाऊँ ॥
कोपित तब बोले आचारी । अनाचार करती तैं भारी ॥

बिन मज्जन बिन भाजन धोये । खिचरी रचै उचै जब सोये ॥
 कर्मा कह्यो नाथ का करुं । प्रभु आज्ञा अरुगुन अनुसरुं ॥
 रहत रोज स्वामी अति भूखो । आवत इतै रोज मुख सूखो ॥
 तब मम विसरि जाति सुधि सिगरी । लगे रहत खिचरी नहिं बिगरी
 मानि मृषा बोले आचारी । त्वहिं यम दंड होयगो भारी ॥
 प्रथम धर्म जानहु आचारा । बिन आचार नरक अधिकारा ॥
 कर्मा कह्यो मानि मन भीती । जस तुम कह्यो करों तसरीती ॥
 तब आचारी वचन बखाना । नाथ निवेदन वेद विधाना ॥

दोहा—दुती दोहनी साजिकै, करि मज्जन उठि भोर ।

दै चौका खिचरी रचै, पोति भवन चहुँ ओर ॥ २ ॥
 अस बताय गे भवन अचारी । करमा किय तैसही तयारी ॥
 पोतत भवन करत अस्नाना । भई विलम खिचरी निरमाना ॥
 जगन्नाथ पुनि २ तहँ आवैं । झांकि २ मुरि २ पुनि जावैं ॥
 डेढ़ पहर बेला जब आई । तब करमा खिचरी बनाई ॥
 तैसे प्रभुको भोग लगायो । जगन्नाथ प्रत्यक्षहि पायो ॥
 आधी खिचरी जब प्रभु खाये । मंदिर पंडा भोग लगाये ॥
 करिकै त्वरा बिना मुख धोये । चले गये मंदिर दुख मोये ॥
 उत पंडा मंदिरहि पखारी । भोग लगावन करी तयारी ॥
 तब देखे प्रभु मुख छबि खानी । एक ओर खिचरी लपटानी ॥
 पंडा सब अचरज मनमाने । बारबार बहु विनय बखाने ॥
 दै केंवार बैठो तेहि द्वारे । मेटहु प्रभु संदेह हमारे ॥
 तब मंदिर ते भै अस वानी । यक दासी मम भक्ति प्रधानी ॥

दोहा—कर्मा बाई नाम जेहि, प्राणहु ते प्रिय मोहिं ।

रचति रही खिचरी नितै, वेद विधान न जोहि ॥ ३ ॥
 देखिं प्रीति में तासु अपारा । रोजहि खिचरी करहुँ अहारा ॥

इक आचारी तेहिं डरवायो । वेद विधान ताहि सिखवायो ॥
करत वेद विधि भै अति बेरा । कैयक बार कियो मैं फेरा ॥
भोजन करन जबै हों लाग्यो । कर्मा प्रीति रीति अनुराग्यो ॥
तब मंदिर महँ महा प्रसादा । लाये तुमहुँ सहित मरयादा ॥
त्वरा विवश मैं मुख न धोवायो । अध भोजन करते उठि आयो ॥
ताते खिचरी मुख में लागी । याकी भीति देहु तुम त्यागी ॥
समुझावहु आचारिहि जाई । अबनहिं करमाको डेरवाई ॥
करत रही रोजहि जसरीती । तस खिचरी अरपैयुत प्रीती ॥
यह सुनि पंडा द्रुत उठि धाये । आचारी को बहु समुझाये ॥
आचारी करमा ठिग आयो । चरणन परि अस विनय सुनायो ॥
वही रीति करु मातु सदाहीं । मेरो कह्यो मान कछु नाहीं ॥

दोहा—अमल विवश मैं त्वहिं कह्यो, क्षमा करहु अपराध ।

तेरे प्रीति फँसे हरी, करुणासिंधु अगाध ॥ ४ ॥

अस कहि आचारी घर आयो । कर्मा वही रीति मनलायो ॥
कछुक काल महँ करमा बाई । तजि शरीर वैकुंठ सिधाई ॥
जादिन कर्मा तज्यो शरीरा । तादिन लंघन किय यदुवीरा ॥
रजनीमें राजै सपनायो । मैं करमैं निज लोक पठायो ॥
अब खिचरी मोहिं कौन खवैहै । प्रीति रीति अस कौन देखैहै ॥
राजा कियो विनय कर जोरी । पावहु नाथ खिचरी मोरी ॥
राजा उठि तुरंत परभाता । रचि खिचरी अतिशय अवदाता ॥
रोजहि भोग लगावन लगा । कर्मा नाम अबै लग जागा ॥
खिचरी करमा बाई केरी । चलै पुरीमहँ अवलग ठेरी ॥
श्रोता देखहु हरि करुणाई । प्रीति रीति जानहिं यदुराई ॥
नहिं विद्या कुल जाति अचारा । नहिं धनराज्य ज्ञान तप भारा ॥
केवल प्रीति रीति महँ रीझैं । वारत ताहि नाथ अतिखीझैं ॥

दोहा—स्मृति शास्त्रहु संहिता, वेद पुराण प्रमान ॥
 विप्र तेई जे हरि भजै, शूद्र भजै जे आन ॥ ५ ॥
 द्वादश गुणयुत विप्रहू, हरि विमुखी है जोय ।
 ताते उत्तम श्वपच है, भक्त जो हरिको होय ॥ ६ ॥
 रामभक्त गो स्वामि बर, कह्यो जो तुलसीदास ।
 सोऊ मैं यहि ग्रंथ में, किंचित करों प्रकास ॥ ७ ॥
 (भौरै परै सु चातुरी, चूल्हे परै अचार ॥
 तुलसी हरिको ना भजै, चारों वर्ण चमार ॥ ८ ॥)

तुलसीकृत रामायण केरी । चौपाई मैं कह्यो निवेरी ॥
 रघुनंदन अपने मुख गायो । श्रोता मैं सो देत सुनायो ॥
 सब ममप्रिय सब मम उपजाये । सबते अधिक मनुज स्वहि भाये
 तिनमहँ द्विज द्विजमहँ श्रुतिधारी । तिनमहँ बहुरि निगम अनुसारी
 तिनमहँ पुनि विरक्त मुनि ज्ञानी । ज्ञानिहुते अति प्रिय विज्ञानी ॥
 तिनमहँ पुनि मोहिं प्रियनिज दासा । जेहि गति मोरि न दूसरि आसा ॥
 भक्तिवंत अति नीचहु प्राणी । मोहिं प्राणसम अस मम वाणी ॥
 सन्मुख जीव होय मोहिं जबहीं । जन्म कोटि अव नाशौं तबहीं ॥
 जाति पांति पूछै नहि कोई । हरिको भजै सो हरिको होई ॥
 ऐसहि जानहु करमाबाई । गै विकुंठ खीचरी खवाई ॥
 हरिहि भजत कछु है न प्रयासा । केवल करै तासु विश्वासा ॥
 प्रभुकी करै भावना जैसी । मिलै जाय प्रभु रीतिहि तैसी ॥

दोहा—श्रोतादेखहु कृष्ण अस, को ठाकुर जग आन ॥

इक सेवकाई करत में, सौ गुण करत बखान ॥ ९ ॥

इति श्रीरामरसिकावल्यांकलियुगखंडे उत्तरार्द्धे अष्टत्रिंशोऽध्यायः ॥ ७ ॥

अथ मामा भैनेकी कथा ॥

दोहा—मामा भैनेकी कथा,भनों भाग्य भुवि भूरि ॥

श्रोता सुनहु सुजान सब,होत पाप सब दूरि ॥ १ ॥

पश्चिम दिशिके देशमें,कियो वास बहुकाल ॥

निकसि चले दोउ भवनते,तीरथ करन उताल ॥२॥

रंगनाथ आवत भये,गे मंदिर जब दोय ॥

बिन मूरति मंदिर निरखि,गये महादुख मोय ॥ ३ ॥

मामा भैनेकी कथा,प्रियादास मतिमान ॥

आधे यही कवित्तमें, सूचन कियो महान ॥ ४ ॥

कवित्त—घरते निकसि चले वनको विवेक रूप, मूरति अनूप
बिन मंदिर निहारिये॥दक्षिणमें रंगनाथ नाम अभिराम जाको,ता-
को लै बनावै धाम काम सब टारिये॥ इति प्रियादास कवित्त को
प्रमाण ॥

मामा भैने उभय सिधारी । बिन मंदिर हरिरूप निहारी ॥

तब दोउ लागे करन विचारा । बनै कौन विधि नाथ अगारा ॥

जो धन अमित यतन करि पावैं । तो प्रभुको मंदिर बनवावैं ॥

इष्टदेव रघुवंशिन केरे । रंगनाथ अस नाथ निबेरे ॥

रघुपति जबै अवधपुर आये । कपिन विभीषण संग लेवाये ॥

विदा भये जब राक्षस राजा । तब वरदान दियो रघुराजा ॥

येक कल्पलगि राज्यहि करहू । पुनि साकेत लोक संचरहू ॥

कह्यो विभीषण तब कर जोरी । राज्य करनकी आश न मोरी ॥

देहुनाथ मोहिं कछुक अधारा । जामे होइ कल्प भरि पारा ॥

तब प्रभु रंगनाथ कहैं दीना । निशिचरपति लैचल्यो प्रवीना ॥

कछुक दूरि जब तेहिं लैगयऊ । रंगनाथ तब भाषत भयऊ ॥

छोड़ै गो मोहिं जौने देशा । तहँ करिहौं आपनो निवेशा ॥